

四庫全書

子部

欽定四庫全書

說略卷二十五

明 顧起元 撰

食憲

麴酒母也一曰酒教也揚雄方言麴

音哭

自關而西秦幽

之間曰麴麴

音年

大麥麴也晉之舊都呼麴為麴麴

干八切

齊右河濟曰麴麴小麥麴北鄙曰麴麴又麴

音卑

細麥麴

也麴

音蒙

有衣麴也今天下通呼麴不聞有此數名也

說文曰酴酒母也醴一宿成也醪渾汁酒也酎三重酒

也醕薄酒也醕首酒也昔人謂酒為歡伯其義見易林
蓋其可愛無貴賤賢不肖華夏夷戎共甘而樂之故其
稱謂亦廣造作謂之釀亦曰醞賣之為沽當肆曰盧釀
之再者曰醖醖酢酒曰醕酒之酒曰醕白酒曰醕厚酒
曰醕甚白曰醕相飲曰配相強曰浮飲盡曰醕使酒曰
醕甚亂曰營飲而面赤曰酡病酒曰醒主人進酒於客
曰酹客酹主人曰酢酌而無酹酢曰醕合錢共飲曰醕
賜民共飲曰醕醉而怒曰哭美酒曰醕

會聚飲食曰酺酺之為言哺也以食曰鋪以飲曰酺詩
曰以開百室鄭氏箋曰百室出必湔間而耕入必共族
中而居又有祭酺合釀之歡周禮族師祭酺注酺者為
人物災害之神田有蝗螟廩有馬瘟皆祭之祭畢而合
飲遂名為酺也校人冬祭馬步杜子春云步即酺也則
其音當為步也春秋緯云酒者乳也王者法酒旗以布
政施天乳以哺人後世酺祭廢而羣飲有禁漢世有賜
酺之典

歷代釀酒名家禹醉令酒見無上祕要夏時儀狄造旨
酒而少康潤色之春秋時有椒漿酒漢時西京有金漿
醪晉時阮籍有步兵厨酒唐時有酒名玉浮梁太白好
飲之宋昌王有八桂酒一名瑞露南唐時臘月釀酒四
月成名曰臘酒宋時有齊雲清露杭新城有秋露白處
州有金盤露劉拾遺家造玉露春宋德隆造酒名月波
曹湜有酒名介壽曹晟名酒曰保平宋劉后有酒名玉
腴秦檜造酒名表勲潞州燒酒名珍珠紅宋時有酒名

銀光相州有酒名碎玉宋開封有酒名瑤泉王師約有
酒名瑤源劉后有酒名瑤池東坡有酒名羅浮春范致
能釀酒於成都用八桂法名萬里春其洞庭春留都春
十洲春海岳春皆宋時酒也梁簡文有酒名鳧花裴度
用龍腦凝結刻小魚兒狀每沸酒一杯投一魚於中名
曰魚兒酒廣南有香蛇酒道士楊世昌造蜜酒西涼州
造葡萄酒肅王有蘭香酒漢武時有蘭生酒蔡攸造棣
花酒陸士衡有松醪廣西有風藤酒又有椰子酒淮南

有菰豆酒名曰綠珠香液黃州有壓茅柴孫思邈造醪
酥酒段成式有造醪醎法為湘東美品琵琶記云銀海
瓊洲泛醪醎是也唐魏徵家有酒名醪醎翠濤十年不
敗宋高后有酒名香泉坡詩云莫辭白酒瀉香泉番僧
來陀花造酒名曰三勒漿一名打辣酥北僧名酒曰般
若湯華言不惹也晉張華有九醞酒以三薇漬麴蘖所
成神異經西北荒中有玉饋之酒開運中賜酒有丑未
觴用雍酥羊髓置煖酒中飲之又光祿大夫韋炳以梁

奉常和泉病於甘劉拾遺玉露病於辛皇甫別駕慶雲
春病於醺乃取三家酒攪合澄審飲之遂為雍都第一
名甕宮集大成以上諸酒美矣未若瀛洲有玉膏泉如
酒飲之長生又神仙日飲天酒一斗為最上至味也

名酒最古者關中之桑落水經注蒲坂劉白墮所造成
於桑落之候反語謂之索郎後史補云河中桑落坊水
所造也魏書汝南王元悅以桑落酒餉元乂極其媚諛
庾信索酒詩有蒲城桑落酒杜甫詩坐開桑落酒張謂

詩亦云不醉郎中桑落酒教人無奈別離何

前酒名未備今更疏之漢名酒又有柘漿隋煬帝得法
於北方造酒曰玉薤唐名酒有瓊花露薔薇露拋青春
燒春麴米春金陵春竹葉春梨花春洞庭春蓬萊春海
嶽春錦波浮玉春風光春土窟春石凍春富水郡筒若
下新豐蘭陵宜城博羅湓水靈溪象洞曲阿又乾和五
穀宜城之九醞河東之桑落西涼之葡萄蒼梧之竹葉
京城之西市腔蝦蟆陵之郎官清河漢之三勒漿宋名

酒有玉井秋香向恭伯曰薌林秋露段子新曰黃嬌范
子元曰萼綠香易毅夫曰菰中雲胡長文曰清無底金
盤露桃花雨范致能曰雲露楊萬里曰桂子香冷冽香
又南岳魏夫人飲王子喬以瓊蘇綠酒醉鄉日月記有
琬液漢大官有桐馬酒又中山酒醉千日而醒桂陽程
鄉酒行千里始醉又宋南渡御庫有流香三省激賞庫
有碧香殿司有鳳泉祠祭有玉練槌京醞有雪醅珠泉
海閩有玉醅建康有秦淮春嚴州有瀟洒泉常州有金

斗泉蘭谿有穀溪春楊郡王有紫金泉其它以堂名若滑州冰堂酒有美堂酒之類未能備載也

外夷之酒瑤琨去玉門九萬里有碧草釀酒味醇飲一合三日不醒大宛國有蒲桃酒車師國無論國亦有蒲桃酒粟弋國蒲桃酒獨美其地水美故也烏孫國有青田核酒烏桓有東牆酒東牆似蓬草實如穉子至十月熟訶陵國有椰樹花酒波斯拂菻有肉汁酒北方有馬湮酒南蠻有檳榔酒頓遜國有酒樹似安石榴採花汁

為酒扶南國有椰漿又有甘蔗土瓜根酒辰溪蠻有鈎
藤酒赤土國有甘蔗酒蘇祿國有蔗酒高麗國有林盧
漿真臘國有蜜糖酒朋牙四酒以樹葉為之有包稜角
酒包稜角米也有糖鑑酒有茭漿酒茭葉所成見元周
達觀風土記美人酒於美人口中含而造之一宿而成
波斯有三勒漿酒南荒有女酒女數歲釀糟置壺於水
中候女嫁決水取之味甚美拘樓國有仙漿酒醉十日
而醒伽盧國亦有椰子酒莆家龍國以椰子撻水漿為

酒國朝四夷酒以暹羅為第一

猫以薄荷為酒雞以蜈蚣為酒鳩以桑椹為酒虎以狗
為酒蛇以茱萸為酒謂食之而醉也南中人以檳榔為
茶亦當以檳榔為酒蓋宋人有云檳榔四德醉能使之
醒醒能使之醉饑能使之飽飽能使之饑

今人名醞之滴薄者為魯酒則以為出莊子魯酒薄而
邯鄲圍之義不知其所謂蓋古也昔者魯人不能為酒
惟中山之人善釀酒之美者醉人至千日焉魯人求其

方不得有仕於中山者至酒家取其醅歸以魯水漬之
謂人曰中山之酒也魯人飲之皆信一日中山之酒主
來聞有酒索而飲之吐而笑曰斯予之糟液也奚其酒
酒之種多矣有以綠為貴者白樂天傾如竹葉盈樽綠
是也有以黃為貴者老杜鶯兒黃似酒是也有以白為
貴者樂天玉液滿金卮是也有以碧為貴者老杜重碧
拈春酒是也有以紅為貴者李賀小槽酒滴珍珠紅是
也今閩廣間所釀酒謂之紅酒其色殆類胭脂酉陽雜

俎載賈罍家蒼頭能別水常乘小艇於黃河中以瓠接
河源水以釀酒經宿色如絳名為崑崙觴是又紅酒之
尤者也

元日飲屠蘇酒從小者起按時鏡新書晉海西公問董
勛者曰俗以小者得歲故賀之老者失歲故罰之唐詩
稱婪尾則以老者後得酒當有餘以優老見莊季裕雖
勛若崔寔月令過臘一日謂之小歲拜賀君親椒酒從
小者起則又不在元日矣婪尾又曰啣尾一云出侯白

酒令巡匝末坐者連飲三杯末坐遠酒行到遲故連飲
以慰取貪婪之義一云咻為燂如鐵出火貴其出色此
尤無謂

古稱能飲者堯千鍾孔子百壺淳于髡一斗亦醉一石
亦醉漢于定國為廷尉飲酒至數石不亂冬月請獻飲
酒益精明鄭康成飲酒一斛山巨源飲八斗盧植能飲
一石晉周顗飲一石劉伶一石五斗解醒嵇阮亦能飲
前燕皇甫真飲石餘不亂後魏楊元慎劉藻皆一石不

亂南齊沈文季飲至五斗妻王錫女飲酒亦至三斗對
飲竟日而視事不廢鄧元起飲酒一斛不亂北史柳蹇
飲一石不亂陳後主與子弟日飲一石孔稚珪飲酒七
八斗又滿寵馬融傳玄劉京魏舒馮跋之皆可飲至石
餘裴弘泰所飲器自杯酌以至觥船重二百餘兩

罰飲之說從古有之周禮觥其不敬者觥罰爵也詩桑
扈兕觥其觥注罰爵也觥然不用禮記檀弓杜蕢酌飲
師曠李調及晉平公投壺僭立踰言有常爵又若是者

浮注有常爵謂有常例罰爵也浮亦罰也一說謂罰爵之盈滿而浮泛也論語下而飲韓詩外傳齊桓公置酒令曰後者罰飲一經程說苑魏文侯與大夫飲酒令曰不醵者浮以大白於是公乘不仁舉白浮君漢書叙傳皆飲滿舉白服虔曰舉滿栝有餘白漑者舉罰之孟康曰舉白見驗飲酒盡不師古曰引取滿觴而飲飲訖舉觴告曰盡不一說白者罰爵之名飲不盡者以此爵罰之徐邈云御叔罰於飲酒陳後主先令張貴妃等襍采

箋製五言詩孔範等十客一時繼和遲則罰酒酉陽雜
俎酒至鸚鵡盃徐君房飲不盡屬魏肇師肇師曰海蟲
蜿蜒尾翅皆張非獨為玩好亦所以為罰餘不能悉舉
然罰飲之數多限以三韓安國作几賦不成罰三升蘭
亭之會王子敬詩不成飲三觥景龍文館記詩序云人
題四韻後者罰三盃又郝隆不能詩受罰及金谷酒數
皆是三斗杜工部詩百罰深盃亦不辭特極言之耳非
實事也注謂王人在江總席上曰雖深盃百罰吾亦不

辭妄撰之說不足據

隋王績追焦革釀法為酒經又采儀狄杜康以來善釀者為酒譜唐汝陽王璿有甘露經唐鄭遨有酒譜十卷竇苹子野亦有酒譜一卷酒錄一卷葛澧亦有酒譜一卷胡節還醉鄉小略五卷白酒方一卷食圖四時酒要一卷藏釀方一卷劉炫酒孝經一卷竇常貞元飲略三卷皇甫崧酒孝經一卷醉鄉日月三卷陽魯龜令圃芝蘭集一卷趙景小酒令一卷崔端已有同塵先生庭萱

譜一卷無求子酒經一卷宋大隱朱翼中北山酒經三
卷李保續北山酒經一卷近又有酒史三卷田汝成醉
鄉律令一卷

酒器 黃帝時有瑪瑙甕中有寶露堯時猶存時淳則
露滿時澆則露竭 紂為瓊杯 周穆王時西域獻常
滿杯 漢文時方士新垣獻玉杯 唐高麗國獻紫
霞杯 蜀賓國獻水晶杯 唐武德二年西域獻玻璃
杯 內庫一杯青色紋如亂絲其薄如葉杯足有鏤金

字曰自煖杯上命以酒置之溫溫然有氣相吹如沸
魏后有瑪瑙榼容三升玉縫之人稱為西域之鬼作

撒馬罕兒國即漢時之屬賓國也進一杯名照世杯光
明洞徹照之可知世事仙家有碧瑤杯爵者容一升

周曰爵觶者鄉飲酒之器也受二升角者以角為

之受四升觶者適也當適可也所以節飲金屈卮

如菜椀而有手把子觥者受五升毛詩注七升罰不

敬也兕觥以兕牛角為之觥者畫為禾稼象於上受

六升商曰斚 斗者取象於北斗受十升 卣者中尊也受五斗 彝者上尊也受三斗 壺者下尊也受六斗 甗者紂臣昆吾作瓦器也受五斗 壺者象雲雷施不窮也受一石金壺容一斛山壺夏尊也壺者圜器也受十斗乃一石也重一百二十斤或曰劉伯倫乙飲一石五斗古時斗窄以今量較之古一石得三斗其五斗當一斗五升也 琖者夏曰琖與盞同 鍾者二缶謂之鍾 杯栝盃船杯匡六字通用 匜者亦杯也罇

本作尊周禮罇盞樽樽通用韓王元嘉有銅鶴尊酒
滿腹則正立淺則傾覆大貝出日南可為酒杯見爾
雅翼觴者卮之總名也謂之羽觴者如生爵之形有
頸尾羽翼瓶甗餅甄通用似鍾而頸長盃者小盃也
椀甗同缶者小瓦盆也秦人擊之以節歌杜詩莫笑
田家老瓦盆自從盛酒長兒孫坎者小壘也見爾雅
勺者挹酒之器容一升與杓同有龍勺蒲勺疏勺皆
裸爵也劉表三爵一曰伯雅七升二曰仲雅六升三

曰季雅五升 嵇叔夜刻杯為鸞鳥之形名曰鸞觴

烏孫國貢劉章青田核大如六升瓠空之注水即如酒

可供二十人 魏正始中鄭公愨取大蓮葉以簪刺之

令與柄通注酒吸之名碧筍 車渠椀玉屬纖理縵文

出西車渠國 綠文測海蠡陳後主酒器也 唐寧王

有煖玉杯 隋文帝時突厥獻玻璃七寶杯唐玄宗以

酌李白 晉王導有琉璃盃 張易之有鴛鴦盞大

甕大勺晉諸阮之酒器也 李太白詩酒飛鸚鵡重有

鸚鵡鐺九曲杯以螺為之藪穴極灣曲可以藏酒古有
青螺卮 李適之七品曰蓬萊盞海山螺舞仙螺匏子
卮慢卷荷金蕉葉玉蟾兒皆因象為名 金鑿落韓昌
黎詩酖顏傾鑿落宋姜堯章詩剪燭屢呼金鑿落馮道
家有水晶不落一隻白樂天詩銀花不落從君勸 陳
思王有鵲尾杓李太白詩有鸛鵒杓 唐文宗賜牛僧
孺龍杓 昭宗有鸛鵒卮 唐時有蓮子杯又有注子
石偏提 五位瓶南唐以銅為之高三尺圍八九尺上

下直如桶 宋乾德間高昌國進琥珀盞 蘇東坡有
藥玉盞 黃庭堅有梨花盞 周益公有鶴飛殘注酒
則鶴飛乾則減 玉東西金叵羅皆古飲器 火雞卵
杯注酒自熟 廣州人取大蝦頭為杯 蟬杯以金銀
為之飲不得其法則雙螯鉗其脣必盡乃脫其製甚巧
梭杯織成花鳥可愛海南出龜同鶴頂杯 酒船以
金銀為之內藏風帆十幅酒滿一分則一帆舉飲乾一
分則一帆落其鬼工也 服匿其形如甕小口大腹方

底受酒酪二斗此匈奴之器 甃破瓢為杯也婚禮婿
揖婦入共牢而食合卺而醕 汕碗折酒之大碗也

玉缸唐詩花撲玉缸春酒香 雙鳧杯一名金蓮杯即
鞋杯也王深輔道有雙鳧杯詞云時時行地羅裙掩雙
手更擎春潋灩傍人都道不須辭儘做十分能幾點春
柔淺蘸蒲萄煖和笑勸人教引滿洛塵忽泥不勝嬌刻
踏金蓮行款款則知昔日狂客亦以鞋杯為戲也

古人以飲茶始於三國時吳志韋昭傳孫皓每飲羣臣

酒率以七升為限，昭飲不過二升，或為裁減，或密賜茶。茗以當酒，據此為飲。茶之證按趙飛燕別傳：成帝崩後，后一夕寢中驚啼甚久，侍者呼問，方覺，乃言曰：「吾夢中見帝，帝賜吾坐，命進茶。」左右奏帝云：「向者侍帝，不謹，不合啜此茶。」云云。然則西漢時已嘗有啜茶之說矣。

建州之北苑，先春龍焙；洪州之西山，白露鶴嶺；雙井白芽，穆州之鳩阮；東川之獸目，綿州之松嶺；福州之柏巖，方山生芽；雅州之露芽，南康之雲居；婺州之舉岩，碧乳。

宣城之陽坡橫紋饒池之仙芝福合祿合蓮合慶合蜀
州之雀舌烏嘴片甲蟬翼潭州之獨行靈草彭州之仙
崖石蒼臨江之玉津袁州之金片綠英龍安之騎火涪
州之賓化建安之青鳳髓岳州之黃翎毛建安之石巖
白岳陽之金膏冷南劍之蒙頂石花湖州之顧渚紫筍
峽州之碧澗明月壽州之霍山黃芽越州之日注此唐
宋時產茶地及名也

南部新書云湖州造茶最多謂之顧渚貢焙歲造一萬

八千餘斤按此則唐茶不重建以建未有奇產也至南
唐初造研膏繼造蠟面既又佳者號曰京挺宋初置龍
鳳模號石乳又有的乳白乳而蠟面始下矣丁晉公進
龍鳳團至蔡君謨又進小龍團神宗時復製密雲龍哲
宗改為瑞雲翔龍則益精而小龍團下矣徽宗品茶以
白茶第一又製三色細芽而瑞雲翔龍下矣宣和庚子
漕臣鄭可開始創為銀絲冰芽蓋將已揀熟芽再剔去
祇取其心一縷用清泉漬之光瑩如銀絲方寸新勝小

龍蜿蜒其上號龍團勝雪去龍腦諸香遂為諸品之冠
今建茶碾造雖精不去龍腦以為奩閣中味亦不用入
淪而茶品獨貴者虎丘其次天池又其次陽羨羨之佳
者界而龍井六安之類皆下矣

蜀蒙山頂茶多不能數斤極重於唐以為仙品今之蒙
茶乃青州蒙陰山產石上若地衣然味苦而性涼亦不
難得也

陸羽茶經三卷茶記一卷周絳補茶經一卷皎然茶訣

一卷又茶苑雜錄一卷不知名陸魯望茶品一篇溫庭
筠採茶錄三卷張又新煎茶水記一卷蜀毛主錫茶譜
一卷丁謂北苑茶錄三卷劉昇北苑拾遺一卷蔡宗顏
茶山接對一卷又茶譜遺事一卷又北苑煎茶法一卷
曾伉茶苑總錄十四卷茶法易覽十卷蔡襄有進茶錄
一卷建安黃儒有茶品要錄熊蕃有宣和北苑貢茶錄
一卷熊客有北苑別錄呂惠卿有建安茶用記二卷章
炳有壑源茶錄一卷宋子安有東溪試茶錄一卷徐獻

忠有水品二卷又不知名氏有湯品一卷田執衡有煮泉小品一卷

黍以大暑而種故謂之黍孔子曰黍可以為酒即今小米北方以之作酒者所謂黃米酒是也蓋小米有二種如稻有粳糯黍是小米之糯者稷者五穀之長五穀不可遍祭以長者該之故祭稷考靈曜云日中星鳥可以種稷一歲之中最先種者亦北方所有比黍稍大較他穀則小耳紫黑色芑有毛關西呼糜冀州呼聚音欠不甚




珍貴農家種之以備他穀之不熟即南方所謂烏山稻
類稻粳糯總名若詩書所稱當依文解之如論語食夫
稻則是粳也月令秣稻必齊則是糯也但字林云糯粘
稻也當屬糯米梁即今之粟也古不以粟為穀之名但
粟厚孚穀故米之有孚穀者皆稱梁世有白梁黃梁之
說爾雅翼云少種梁者以梁損地力而收穫少也今驗
之粟果然又早稻米謂之黃私乃出於占城又稱之
占城稻宋真宗聞其耐旱而早熟自占城而求種分給

江淮兩浙擇田之高者種之

五穀之異者背明國在扶桑東名曰融澤有浹日稻十
旬而熟翻形稻食之更生明清稻食者延年清腸稻食
之不饑搖枝粟食之益髓鳳冠粟食者多力遊龍粟葉
曲如龍瓊膏粟竝食之體輕饒明豆挾劍豆傾離豆食
之無老疾延精麥食之延壽益氣昆和麥食之調暢六
腑輕心麥食之體輕醇和麥釀酒一醉累月含露麥穠
中有露如飴雲冰麻實冷有光宜為油通明麻食之夜

行不持燭見拾遺記日林國有靈光豆類中華之菽豆
色殷紅而光芒可數尺和石上菖蒲煮之即大如鵝卵
中漲紫嚼一丸香美數日不饑渴見杜陽編會昌國有
碧麥表裏皆碧香氣如粳食之體輕可以御風紫米類
巨勝炊一升得飯一斗食之髭髮鬢黑顏色不衰見太
平廣記交趾有稻夏熟一歲再種見異物志

左傳粢食不鑿字當作繫精細米也詩召旻彼疏斯稗
鄭玄曰疏粗糲米米之率糲十稗九繫八待御七又九

章算法云粟五十為糲三十粳二十七𥽿二十四御二十一皆三之一也或曰粟一石為糲米六斗舂一斗為粳九升又云為𥽿則八升米之細者乃窮於御通於𥽿楊恒六書統曰𥽿米五升舂為四升曰𥽿為五減而四也古篆作象四○以見意小篆作𥽿米減而三曰晶古篆作象三○以見意糲而𥽿𥽿而𥽿𥽿而精細之極也魏校六書精蘊曰精粹字皆从米精者何也米之脫粟也色微黃赤人皆知其粗也糠去而白𥽿矣未

也鑿矣未也春而近心矣色微若青此生意所函也粹者何也始而礱米穀也中而舂米去膜也卒而舂米去弱也乃後瑩然玉粒萬粒與一粒同雖欲去之無可得而去矣學問之極功猶是易曰純粹精也其是之謂夫王莽末黃金一斤粟一斗愍帝時米斗貳金是一斗粟易錢二十緡一石粟易錢二百緡也後漢末董卓之亂百姓流離穀石至五十萬唐潼關失守魯靈所守郡斗米五十千是一石穀為錢五百緡也梁侯景陷石頭常

平倉米一斗七八萬錢是一石米為錢七八百緡也自古米貴未有如是之甚者漢明帝永平間粟斛三十正與唐太宗米斗三錢之價同亦可謂至廉矣

油通四方可食與燃者惟胡麻為上俗呼脂麻言其性有八拗謂雨暘時薄收大旱方大熟開花向下結子向上炒焦壓榨方得生油膏車則滑鑽針乃澁也而河東食大麻油氣臭與荏子皆堪作雨衣陝西又食杏仁紅藍花子蔓青子油亦以作燈祖珽以蔓青子薰目致失

明今不聞為患山東亦以蒼耳子作油此當治風有益
江湖少胡麻多以桐油為燈但烟濃汙物畫像之類尤
畏之沾衣不可洗以冬瓜滌之乃可去色青而味甘悞
食之令人吐利飲酒或茶皆能蕩滌蓋南方酒中多用
灰爾嘗有婦人悞以膏髮粘滯百治不能解竟髡去之
又有旁毗子油其根即烏藥村落人家以作膏火其烟
尤臭烏柏子如脂可灌燭廣南皆用處婺州亦有潁州
亦食魚油頗腥氣宣和中京西大款人相食煉腦為油

以食販於四方莫能辨也

李白詩客到但知留一醉盤中祇有水晶鹽按梁天監
中天竺王屈多遣長史竺羅獻方物云其國有恒水其
水甘美下有真鹽色正白如水晶金樓子云天竺有鹽
瑩如水晶謂之玉華鹽酉陽雜俎云白鹽崖有鹽如水
精名為君王鹽段公路北戶錄云鹽有如水精狀者一
統志撒馬兒罕土產水晶鹽堅明如水晶琢為盤以水
濕之可和肉食然則祇以此味按酒亦自不儉

王楙考周禮廩人月三鬴注六斗四升曰鬴計食米日六升四合也魏李悝曰人食米月一石半是食米日五升也漢趙充國曰以一馬自佗負三十日食為米二斛四斗麥八斛是人日米八升馬日麥二斗七升也匈奴傳一人三百日食用糲十八斛是人日糲六升也古斛小漢二斗七升當今五升四合所謂人食米八升當今二升一合六勺食米六升當今一升六合觀一馬能負米麥至此可以徵其升斗之小而倉公傳所載人大小

腸受水米之數不至可駭矣第沈存中言六斗為一斗
七升九合而楸則六斗當為一斗六升更少升九合似
當以存中為據也

遵有四朝事饋食加遵羞遵豆亦有四朝事饋食加豆
羞豆遵實之目十有八而臬重出豆實之目二十有四
而醢醢魚醢重出朝事遵實麴菁白黑形鹽臠魚醢鮑
魚鱠熬麥曰麴麻曰菁稻米曰白黍米曰黑蓋以麥麴
麻子稻黍末作餅餤注謂清朝進寒具口實也形鹽左

傳所謂鹽虎形𩺰音呼說文云無骨脂注謂𩺰生魚為大𩺰疏為魚腹𩺰鮑部巧切韻書云體魚也注謂𩺰室中糗乾之字從魚蓋魚之糗而乾者也魚𩺰之𩺰音搜魚之折而乾者也𩺰以腥薦鮑𩺰以乾薦糗字按說文火焙肉恐是鮑者火焙而乾𩺰者日曝而乾故均之為乾魚而異名也𩺰為魚腹𩺰則𩺰鮑魚𩺰皆魚也朝食為米食寒具魚乾之屬可夙具者也饋食邊實棗栗桃乾榛榛實注謂榛為梅謂榛似栗而小饋食始備米實

也加邊菱芡栗脯脩注謂菱芡也謂芡雞頭也或云四角三角為芡兩角為芡鄭司農以栗在加邊饋食重出作菱芡脯脩薄析曰脯施薑桂曰脩言修治脯也羞遵糗餌粉飡注謂熬成豆米曰糗說文熬米麥通釋煬乾米麥要之米麥豆皆可為餌者也注以粉為豆屑米麥豆亦皆可為粉但粉以豆為明滑故專以豆言之餌與飡名實相近合蒸曰餌餅之曰飡疏云糗與粉為一物糗者搗粉熬大豆餌言糗飡言粉互相足也鄭康成云

二物皆粉稻米黍米合以為餌餌不餅而糝作餅今之
糝糕名出於此凡今俗下餅餌糝糕其制多出於古人
其名已載於經典觀於遵實可見也朝事豆實韭菹醢
醢昌本麋醢菁菹鹿醢茆菹麋醢菹莊魚切說文酢菜
也今俗設菜枰中漬菜皆菹之遺法醢吐感切注謂肉
汁說文謂血醢醢者說文肉醬醢音泥亦醢之異名注
謂有骨曰醢無骨曰醢凡作醢及醢者先膊乾其肉莖
之雜以梁麴鹽酒置瓶中百日即成今俗用鰕醬醢醢

醢之遺法昌本昌蒲根也菁菹蔓菁菜也茆菹鄭司農
作茆杜子春音卯曰鳧葵也康成疑茆不堪菹從杜說
按魯頌薄采其茆釋文云即蓴菜也麋鹿麋三鸛皆莖
骨和肉為百日醬皆在朝事之豆亦取晨朝易於夙辦
饋食豆實唯葵菹在七菹之列餘皆齏醢葵菹羸醢脾
析麋醢蜃蜃醢豚拍魚醢葵為百菜之長故饋食豆實
首葵而他菹莫配焉脾析蜃豚拍皆五齏中件目脾析
牛百葉俗呼牛胃為百葉已見周禮注矣蜃說文大蛤

豚拍之拍先鄭讀為膊言脅也三者近於齏醢而曰壘
壘者以百葉諸物細切之和以醢醬不待瓶中百日而
成故別為壘之名壘從韭宜用菜若昌本深蒲作壘固
宜百葉蜃豚之肉亦可縷以為壘也羸注謂蜃蜃按方
言燕趙間以為蜘蛛韻書以為蝸牛蜘蛛蝸牛非可食
者疏釋引爾雅為證彼爾雅乃訓詁之儒集經注以為
書或疑內則有蝸醢恐是蜃蜃蝸牛之謂然內則之蝸
乃力戈切集韻古螺字作蝸韻釋云蚌屬也非蝸牛之

蝸矣陸佃直謂蝸牛可醢蓋為禮注所誤爾羸螺字亦作蝸韻書以為香螺也羸注謂小蛤韻書以為蚌狹而長者蚶漢儒相傳為蚶蜉白子亦恐不然蚶蜉未必可食也取白子傷生二也按天官有鼈人掌取互物祭祀供羸羸蚶以授醢人則蚶與羸羸皆當是螺蛤同類既掌以鼈人之官可知為水族之產若以國語為證則國語亦但言舍蚶不取未嘗指蚶蜉之子可取而食也唯夏小正於二月言昆小蟲抵蚶其傳曰蚶蜉卵為祭醢

夏小正本文無幾其解說處多是漢儒附會未可盡信
按月令方春和時毋殺孩蟲胎夭飛鳥毋麝毋卵豈有
二月正春殪螳穴以為豆實之奉哉巷伯成是貝錦注
以貝為餘蜺貝之黃質白文者或可為鼈人互物之證
蜺或從身醫書云食之益壽明目豈必螳卵而後謂之
蜺哉鼈人春獻蜃以為醢故小正以二月抵蜺此雖流
傳已久而必當改正者小正以蜃為蒲蘆朱子以為其
書不足信愚於蜺為螳卵亦不敢以為信唯魚醢用魚

可免注者妄言矣加豆之實芹菹兔醢深蒲醢醢落菹
鴈醢筍菹魚醢芹楚葵水菜類蒿深蒲或云桑耳或云
蒲始生水中韓奕詩云其藪維何維筍及蒲知蒲可為
藪不必曰桑耳也落有苔迨二音鄭注云水中魚衣即
苔也今海鄉之人乾苔以為菹或疑落字從竹為落箭
筍竹萌不思箭萌亦筍爾既有筍菹安用箭萌籀文竹
草相似其為苔菹何惑焉兔醢用兔鴈醢用鴈魚醢用
魚如上文羞豆之實醢食糝食醢音移鄭司農云以酒

酏為餅疏云若今起膠餅康成曰饗賈氏曰粥禮記有
稻酏黍酏周禮亟稱於酏酒正之五飲漿人之六飲皆
用酏也糝食鄭司農云菜餼蒸康成曰取牛羊豕之肉
三如一小切之米二肉一合煎為餌鼎卦公餼之注云
糝食也震為竹竹萌為筍餼之為菜則糝食未嘗不用
筍菹之筍也糝食酏食在七菹之外豈惟竹萌唯所用
之豆實有五齊七醢七菹三醢二食五齊之齊注作齋
昌本深蒲脾析蜃豚拍七醢醢魚兔鴈麋羴蜺七菹韭

菁莪葵芹芣苢三鸛麋鹿麋今孔子廟丁祀菹醢多不
如法不考周禮故爾邵氏錄云劉夢得欲用糕字作九
日詩以經典無據不敢用宋子京按周禮粉飧之注作
九日詩云劉郎不敢題糕字虛負詩中一世豪俎豆之
事不得以未嘗聞為解也今廣中蟻子白而大淹之實
可為醬與魚子醬正同此亦是蝦子醬桂蠹之屬也耳
目所不及遂疑古人之言可笑也

拾遺記載宋景公食善星文者渠滄之鳧煎以桂髓叢

庭之鷄蒸以蜜沫淇漳之鱧脯以青茄九江珠璣爨以

蘭蘇華清夏潔灑以纖縞又載燕昭王食旋娟提謨

美二

人瑞珉之膏丹泉之粟漢武內傳王母有風實雲子碧

海琅菜玄都綺葱扶桑丹椹長河文藻太真紅芝九色

鳳腦斑龍黑胎蒙山白鳳之睥靈丘蒼鸞之血又有流

淵瓊魚雞跖集武夷君食河祗脯神仙傳謝玄卿遇仙

設鳳冠粟龍睛稻素麟脂斑螭髓周官王會圖有烏鰂

之醬杜陽編懿宗迎佛有瓊膏乳

訶陵國所獻

撫言宣宗賜

韋澳孫宏有銀餅餤穆天子傳有重醅氏木禾黑水麥
苦山菜梁吳筠食移有江臯綠蔬筍洞庭紫鬣魚昆山
龍胎脯玄圃鳳足菹扶南蔗一丈三節安定梨一歲三
花又餅說有安定噎鳩之麥抱罕赤髓之羊洞庭橘仇
池椒劉孝儀謝晉安王蝦醬箋有龍醬蚬醢庾肩吾謝
齊米啓有渚水鳴蟬瓊山合頰段成式酉陽雜俎有獲
炙麋臠鱣翠牒腴桂蠹蘇膏石鮓熊蒸魚鮓鴈鳧荊飴
芋炙饅饅粃炙糒蛆子蟹蛭葫精細飄

魚一曰鰈

梨酢杏

炙蟾臙鳳丸述蕩之擊旄象之約河隈之鮓鞏洛之鰓
洞庭之鮒灌水之鯉珠翠之珍菜黃之鮐蕘野之梁不
周之稻玄山之禾楊山之稌南海之柁壽木之華玄木
之葉夢澤之芹具區之菁楊撲之薑招搖之桂越輅之
茵長澤之卯三危之露崑崙之井黃頤臙醒酒鯖蒲葉
菰竹根栗蟲足鱧蜩膠籠上牢丸湯中牢丸白龍含
黃龍舍一丈三節蔗一歲二花梨又稱當時蕭家餽鮑
可以淪茗庾家粽子白瑩如玉韓約櫻桃畢羅其色不

變同昌公主傳有紅虬脯消靈炙韋巨源食單其異者
有單籠金乳酥貴妃紅御黃王母飯金鈴炙七返膏見
風消冷蟾羹金銀夾花平截唐安餤玉露團長生粥漢
宮棋子水晶龍鳳膏天花餠鑼白龍臚素蒸音聲部雪
嬰兒卵羹小天酥纏花雲夢肉紅羊枝杖筋頭春等名
謝諷食經其異者有飛鸞膾剪雲析魚羹紫龍膏象牙
鮓恬乳花面英朱衣餤千日醬越國公碎金飯新治月
華飯等名又陶穀清異錄食品有煬帝縷金龍蟹寶厯

御庖清風飯張彌寒消粉上供玉火麪張手美澆店有
人日六一菜重九米錦臘日萱草麪吳淑有玉杵羹金
綿鮓西湖遊覽志載清河王張俊供高宗食品具異者
荔枝白玉藥羹水晶膾二色蠶兒羹蓮花鴨簽又清異
錄載金陵七妙有齏可照面餛飩湯可注硯餅可映字
飯可打擦臺濕麪可穿結帶醋可作勸盞寒具嚼著驚
動十里人

寒具今之餠餅也劉禹錫佳話有寒具詩云纖手搓來

玉數尋碧油煎出嫩黃深夜來春睡無輕重壓徧佳人
纏臂金乃以捻頭為寒具也

劉禹錫嘗曰宋考功詩馬上逢寒食春來不見飴疑此
字僻讀毛詩有瞽注乃知六經中惟此注有飴字按揚
雄方言有此一字樊僚傳三歲獻甘醪膏飴又考周禮
少師掌教簫注亦有飴字則是飴字六經中不但詩注
有此一字又見於周禮注矣且二句是沈佺期詩誤以
為宋也

今人久茹素而其親若鄰設酒殽之具以相煖熱名曰開葷於理合曰開素此風已見六朝觀東昏侯喪潘妃之女閹豎共營殽差云為天解菜正其義也

崔浩馬琬盧仁宗竺暄劉休謝諷各有食經何曾有食疏梁大官有食經有食法隋大業有淮南王食經食目虞悰有食方唐趙氏有四時食法蕭家法饌楊曄有膳夫經手錄嚴龜有食法曹子休有續法饌段文昌有食經號鄒平公食憲章王易簡有食法黃克明有江殮饌

要偽唐陳士良有食物本草孟蜀有食典宋林洪有山
家清供二卷近韓奕公望有易牙遺意二卷又周履靜
續易牙遺意一卷

何曾食日萬錢子劬日二萬錢任愷一食萬錢和嶠日
三萬錢高陽王元雍一食數萬錢杜岐公惊日五食一
食萬錢李衛公德裕至一杯羹二萬錢韋侍郎陟至厨
中棄遺直萬錢元丞相載用食物椀器至三千事

蔡太師京厨婢數百人庖子亦十五人段丞相有老婢

名膳祖四十年閱百婢僅九婢可嗣法孫節度承佑一
宴殺物命千數蔡京每殺鵠子輒千餘承佑每謂人今
日富有小四海矣謂南螭蚌北紅羊東蝦魚西粟皆備
也尸子曰桀紂必南海之薑北海之鹽西海之菁東海
之鯨

何太宰曾每宴不食尚方食晉武帝令就其家取之帝
幸王武子第侍婢數百人各持琉璃器供膳食蒸豚有
異於常問乃以人乳飲之齊武帝幸芳林園就虞悺求

扁米糲獻糲及雜肴數十輿大官不及也上欲求飲食
方悰祕不肯出上醉後體不快悰僅獻醒酒鯖鮓一方
而已

食之多者波斯王每食酪肉麩蜜至二石餘肥重不能
行佛為說法乃減一石廉頗七十餘一飯斗米秤肉注
云秤十斤也苻堅拂蓋郎夏默等三人長至丈九尺每
食飯一石肉三十斤宋明帝噉白肉至二百片蜜漬鱖
鯪一頓數金鉢蕭穎胄噉白肉膾至二斗南燕慕容德

時逢陵長王鸞長九尺腰帶十圍貫甲跨馬不由鎧德
見而奇之立盡一石唐忠義傳張興一飯斗米肉十斤
湖南馬希聲日食雞五十張司空齊賢罷相知安陸賓
客會廚吏密寘一金漆大桶廳側窺公所飲食如其物
投桶中至暮漲溢桶外公一食肥豬肉輒十餘斤風藥
黑神丸常人服不過彈許公常以五兩為大劑夾以胡
餅頓食之趙丞相雄上殿奏事上從容問曰聞卿善啖
欲作小點心相請如何趙起謝遂命內侍捧史忠惠所


進玉海容三升者賜之凡七賜皆醕繼以金拌捧龍炊
百枚食其半上曰卿可盡之遂食至盡上為之一笑後
南帥日欲求其偶而不得有以兵馬監押薦者召對飲
各盡酒三斗豬羊肉各五斤蒸糊五十事趙已醉飽摩
腹而其人尚醒因更進酒斗許將別其人腹間忽砉然
有聲蓋恒時束革帶限之漲而斷也

古人有偏嗜文王嗜昌歆齊王嗜雞跖王莽嗜鰕魚曾
皙嗜羊棗宋明帝嗜蜜漬鯁鯪一食數升范汪嗜生梅

頃刻食一斛致盡蕭宏嗜鯖魚頭日進三百魏徵嗜醋
芹孫承佑嗜鯉魚鰓肉馮延巳嗜山雞其尤奇者劉邕
嗜瘡痂鮮于叔明嗜蟠蟲周薛震好食人肉周刺史張
懷肅唐郎中任正言好食人精權長孺好食人爪甲

師曠荀勗苻朗皇甫謐劉子陽妙於味者也彭鏗易牙
毛德祖虞棕曲良翰彭湘潔工於味者也魏文齊武隋
煬吳質何曾何劭和嶠王愷王濟石崇劉穆之徐湛之
何勗阮佃夫朱异羊侃元雍元琛崔瞻爾朱文略韋安

石韋陟裴冕元載段文昌李德裕趙雄武孫承佑陶穀
蔡京張俊張鉉侈於味者也廉頗樊噲王鸞典韋李勲
勇於味者也宋明山濤劉道真江淹蕭穎胄鹿宜孫馬
郁杜悰廖易之張齊賢張慤趙雄洪於味者也張易之
張昌宗韓縝酷於味者也羅友陳仲潛猥於味者也鄭
子公御斟司馬子期小人於味者也



說略卷二十五

欽定四庫全書

子部
說略卷二十六

詳校官中書臣孫 球

主事臣祁韻士覆勘

總校官庶吉士臣何思鈞

校對官中書臣潘庭筠

謄錄監生臣王增聞

欽定四庫全書

說略卷二十六

明 顧起元 撰

珍格

少昊時金鳴於山見拾遺記秦獻公十八年櫟陽雨金
見史記孔子修春秋製孝經既成孔子齋戒向北斗星
辰而拜告備於天乃有赤虹見自上而下化為黃金見
搜神記魏明帝時昆明國貢嗽金鳥常吐金如粟宮人
以金飾釵謂之辟寒金見拾遺記晉陵薛願有虹飲其

釜翕響便竭乃吐金滿釜見異苑陳尚書言嘗有二道士一黃衣一白衣詣其家求宿夜聞二客床上錫然有聲秉燭視之白衣下乃銀人也黃衣復不見見稽神錄何文買宅梁上有人長丈餘赤幘呼細腰乃金也侯適見黃石大如斗收之皆化為金見幽怪錄

水經注言犍為朱提縣山水險奇數百言而不及朱提銀事亦一漏也朱提銀比之他銀極貴價可益十之五見食貨志武帝時以銀為幣其文龍直三千其文馬直

五百其文龜直三百至平帝而始有朱提銀耳周穆王時有燭銀其光可鑒曰天子之寶蓋不以為幣也

說文鉛青金也錫之類能殺蟲毒錫銀色而鉛質也古稱鉛為黑錫今曰黑鉛是也禮金錫注錫鉛也鑷也今曰鑷錫是也本草云錫有黑有白錫粉胡粉也當云鉛粉蓋鉛可燒粉而錫不可燒今之定粉水粉是也古稱鉛生蜀錫生桂陽今無錫縣有錫山廣信府有鉛山又曰有銀坑處有之

攻金之工如築冶梟稟段桃以金工料言之宜用銅鐵等物為多特總名曰金錫以分六齊六分其金而錫居一為鐘鼎之齊五分其金而錫居一為斧斤之齊四分其金而錫居一為戈戟之齊三分其金而錫居一為大刃之齊五分其金而錫居二為削殺矢之齊金錫半為鑑燧之齊使如今時所謂錫則豈堪為斧斤戈戟矢刃哉梟氏改煎金錫定火候以青黃黑白之氣而使以鑄量使如今時所謂錫則豈能聲中黃鍾之宮哉觀史記

平準書及漢食貨志並稱銀錫漢武帝造銀錫為白金
可以見古者銀與錫通稱白金考工先秦古書當以錫
為銀鉛之總名說文謂錫曰銀鉛之間稍近古意徐氏
不察考工金錫之說殊失許叔重本旨周禮卅人職金
皆言金玉錫石蓋銅鐵銀錫皆取卅煉成言錫而不必
枚舉銅銀鐵也嘗歎漢儒拘爾雅之文於卅人之注直
以錫為鉛鉛爾雅專以銀為白金不思漢時固以錫為
白金其注鐐銀鉞金名物瑣細而於考工金錫之義乃

無所發明曾不若說文能合錫鉛以言錫也職方氏於揚州言金錫荊州言銀以今出產之地言之則銀在揚而錫在荊錫亦銀也特以荊揚地利互文見之爾若如今人分別銀錫則考工所謂金錫於理有不通者故著其說使讀考工記者無惑焉今世用物銅鐵為多經文絕少言銅亦罕言銀鐵考工言金者鐵銅在其中言錫者銀鉛在其中合而言之總曰金錫爾聞決銀者言錫能賊他金似不宜混合然物各有用攻金之工不一銅

鐵及鋟銅得銀愈佳鑄銅得鉛益骨金錫相須尚矣
世言錢起於太公九府圜法前漢志云凡貨金錢布帛
為用夏殷以來其詳靡記漢鹽鐵論亦曰夏后以貝殷
以紫石後世或金錢刀布是周以前未用錢也然太公
六韜曰武王入殷散鹿臺之金錢以與殷民史記曰紂
厚賦斂以實鹿臺之錢又曰散鹿臺之錢以賑濟貧民
高謙之曰昔禹遭大水以歷山金鑄錢救人之困湯遭
大旱以莊山之金鑄錢贖人之賣子是三代皆已鑄錢

不但周也

按志云黃金方寸為斤又云一斤即一金也四兩為一斤又曰一斤十六兩愚謂漢書明有賜千金及賜金千斤之異則一金當為四兩而一斤為十六兩也按漢食貨志武帝時錢益多而輕物益少而貴乃制白金三品其一曰重八兩環之其文龍名白撰直三千二曰以重差小方之其文馬直五百三曰復小橢之其文龜直三百是其時號錢輕昂銀以為幣而八兩直三千八錢止

直三百也今錢之極重而精者

世宗朝嘉靖錢每銀一兩直錢七百尚以兩錢當漢錢一也王莽當篡漢時造錢貨有六品契刀錯刀之類不論而銀貨二品黃金一斤直錢萬銀八兩為一流朱提銀一流直錢一千五百八十他銀一流直錢一千朱提銀出犍為至精價不可憑以他銀與黃金計之金一斤當直他銀五斤金一兩直他銀五兩也正與今不異若金四兩為斤計之則金一兩當直他銀二十兩也漢黃

金賤而白金貴必不縣絕乃爾又以王莽傳言之羣公
奏故事聘皇后黃金二萬斤為錢二萬萬則一斤萬錢
之說合矣漢賜霍光黃金七千斤當為錢七千萬也周
勃黃金五千斤錢五千萬也然銀八兩而直錢一千則
八錢止直一百也錢之貴三倍於武帝時矣董賢家財
總錢四十三萬萬算之在武帝時當直龍文白撰直金
一千六十六萬六千兩在居攝時為他銀三千四百四
十萬餘兩居攝正係哀帝一二年賢家錢直當以後為

準後漢供南單于歲一億九十餘萬西域七千四百八十萬然則一億為一萬萬也又段熲征諸羌議以騎五千步萬人車三千兩三冬二夏費約五十四億為五十四萬萬也靈帝賣官公為錢千萬卿五百萬若以前漢錢直計之是公當出黃金五百斤卿二百五十斤是時南單于西域皆賓服而歲供一為黃金一萬九千一百一十斤為黃金七千四百八十斤而三歲征羌之費直黃金五十四萬斤矣萬萬無此理按桓帝時貨輕而財薄欲改

鑄大錢以劉陶言而止然則是時錢不能西漢十之一也以後鵞眼綖環之類而錢日賤斗米一萬則又千百而一也或輕或重可準則約略言之孝武元狩五年至平帝元始中凡一百十五年成錢二百八十萬萬而宋神宗熙寧八年每年鑄銅鐵錢五百四十九萬九千二百三十四貫凡貫緡皆百錢當為五萬四千萬九百二十三萬四千文不四十歲而鑄漢百十五年錢若以千錢為貫緡又當十倍蓋漢錢精而貴其價六倍於今之

上錢唐宋錢薄小而賤什不能當今上錢一也至於黃金則漢甚多而易得今極少然其價貴僅十分踰二耳不甚懸也每見漢黃金以為富於後世數十倍見唐宋錢緡以為富於漢數十倍要而言之漢實富也

郭子儀傳云每歲月俸母慮二十四萬緡一緡為百錢則當二千四百萬錢也若一緡為千錢則十倍之矣又每入朝上命魚朝恩元載送為主一宴至費錢十萬緡按唐自開元二十四年六月總定一品月俸料八千食

料千八百雜用千二百防閣十五千通計二十四千二百然則一歲俸入錢當為二十九萬四百僅二千九百緡餘耳汾陽縱所兼十餘職皆極品安能百倍其數邪且一宴之費為十萬緡亦當為萬餘金矣當是時天下方遭亂戶口歲入有限必不能爾抑史夸言之也

唐食貨志云武德四年鑄開元通寶徑八分重二銖四系積十錢重一兩得輕重大小之中其文以八分篆隸三體又云開化二十六年已後錢甚惡詔所在置監鑄

開元通寶錢京師庫藏皆滿肅宗上元元年以開元舊錢一當十孔毅夫云開元通寶錢給事中歐陽詢撰文并書四環可讀俗不知以為開元錢明皇所鑄六典謂之開元通寶司馬光云薛瑄唐聖運圖云初進蠟樣文德皇后搯一甲故錢上有甲痕焉凌璠唐錄政要以為寶皇后是時寶后已崩文德皇后未立今皆不取李審言記聞云唐之錢文如乾元開元曰重寶通寶世俗淺者有云乾重開通朝士尚有如此言者尤可笑也馬永

卿云開元通寶蓋唐二百八十九年獨鑄此錢洛并幽懷等州皆置監故開元錢如此之多而明皇紀號偶相合耳有左挑開元錢雙挑開元錢篆字開元錢封寅曰武宗會昌五年鑄開元錢令廢天下佛寺像宰相李德裕請以廢寺銅鐘佛像及僧尼瓶碗等物命所在鑄錢揚州節度使李紳乃以所廢寺鐘鑄錢背皆昌字以表年號又有勅令鑄錢所各加本郡州號名為背文其異域及偏霸僭國所鑄錢有可攷者得一元寶又順

天得一唐史思明僭鑄保大元寶江南主李景鑄又有
唐國通寶大唐通寶皆南唐元宗所鑄也壽昌元寶遼
道宗壽昌年鑄大興平寶錢之鏤有丁字疑五代僭鑄
錢也大德重寶偽殷王建所鑄錢之鏤有殷字者乾元
重寶偽漢劉儼所鑄永平元寶通正元寶天漢元寶皆
前偽蜀王建鑄光天元寶咸康元寶皆前偽蜀王衍鑄
廣正通寶前偽蜀孟昶改元鑄乾亨通寶宋太平興國
七年遼主耶律隆緒鑄統和元寶宋太平興國八年耶

律隆緒鑄太平元寶宋天禧五年耶律隆緒鑄清寧通
寶宋至和二年耶律隆緒鑄咸雍通寶宋至平二年耶
律洪基鑄太康元寶宋熙寧七年耶律洪基鑄太康通
寶同上大安元寶宋神宗元豐七年耶律洪基鑄乾純
元寶徽宗崇寧元年耶律延基鑄天慶元寶宋政和二
年契丹國主在燕山府鑄阜昌重寶高宗建炎四年知
濟南府劉豫叛降金金人以山東河南陝西為齊國立
豫僭號改元阜昌大定元寶金世宗鑄鎰有申酉字正

隆元寶金海陵王鑄於太原府至大通寶元武宗鑄皇
慶通寶元仁宗鑄至治通寶元英宗鑄政和通寶至正
通寶元順帝年號又三韓重寶楷書一樣東海通寶楷
書篆二樣東國重寶海東通寶海東重寶朝鮮通寶真
書以上係東海蕃錢也

其博戲中私鑄錢者合門清吉秦將散騎鎔有騎馬將
軍稱心遂意鎔有碌出入通泰鎔有馬鞍天下太平長
命富貴封侯拜相忠孝傳家金玉滿堂五男二女花生

不老鐸有云花草團圓二字八卦錢面有八卦文文命錢面有十二屬生者龍鳳文錢等樣

宋洪遵所募泉志其正用品則虞錢夏錢商錢周錢景王錢齊錢晉錢楚錢趙錢秦錢秦半兩錢漢莢錢八銖錢四銖錢三銖錢半兩錢五銖錢鍾官赤側錢後漢五銖錢四出文錢魏五銖錢蜀直百錢直百五銖錢傳形五銖錢吳大泉五百錢大泉當千錢宋四銖錢當兩大錢孝建四銖錢二銖錢景和錢鸞眼錢梁五銖錢公式

女錢五銖鐵錢大吉鐵錢大道鐵錢大富鐵錢當十錢
四柱錢陳五銖錢大貨六銖錢後魏太和五銖錢五銖
錢永安五銖錢永安土字錢西魏五銖錢東魏永安五
銖錢北齊常平五銖錢後周布泉錢大布錢永通萬國
錢隋白錢唐開元錢乾封錢乾元十當錢重輪錢小乾
元錢大厯錢開元大錢建中錢新開元錢咸通錢後唐
天成錢晉天福錢漢漢通錢周周通錢偽品有項梁大
錢吳王濞半兩錢鄧通半兩錢王莽大錢小錢貨泉錢

公孫述鐵錢董卓小錢五銖錢沈充小錢張軌小錢王
則河陽錢史思明得一錢順天錢李景永通錢開元鐵
錢唐國錢大唐錢王建永平錢通正錢天漢錢光天錢
王衍乾德錢咸康錢孟昶廣政錢鐵錢劉龔乾亨錢鉛
錢馬殷乾封錢天策錢錢俶錢王審知錢開元鐵錢王
延義永隆錢王延政天德錢馮洪大興錢劉仁恭土錢
劉守光應天錢不知年代品有平當五銖錢大泉四出
錢大泉五銖錢雙五五銖錢左右五銖錢太元貨泉錢

通行貨銖錢兩銖錢續銖錢兩柱錢女錢雉錢對文錢
五銖錢定平錢傳形半兩錢太平四錢兩晉錢一文錢
四曲文錢永光錢五金錢太朝錢天鎮錢萬歲錢大興
錢大千錢天感錢古錢古文錢三字錢千字錢黃河錢
天品有天帝錢寶錢咸陽錢金五銖錢五銖錢刀布品
有白金三品契刀錯刀大布次布第布壯布中布差布
厚布幼布幺布小布貨布大黃布刀古刀布蒙城古刀
長平古刀沂州良刀長平異布竊心錢蟻鼻錢古銅片

又異布十四種外國品有罽賓國錢烏弋山離國錢安息國錢大月氏國錢泥婆羅國錢何國錢康國錢拔汗國錢條支國錢拂菻國錢大食國錢因墀國天壽錢日本國和同錢神功錢萬年錢隆平錢乾文錢屋駄國梵書錢疏勒國五銖錢龜茲國五銖錢吐蕃國蕃書錢倭國延喜錢梵字錢契丹國天贊錢應歷錢重熙錢清寧錢大康錢大安錢壽昌錢乾統錢天慶錢千秋錢高麗國海東錢三韓錢東國錢閼婆國梵書錢交趾國黎字

錢大秦國錢三佛齊國錢佛湟國錢東沃沮國錢新羅
國錢高昌國錢波斯國錢女國錢大月氏國錢小月氏
國錢中天竺國錢于闐國錢投和國錢阿耆國錢屈支
國錢覩貨邏國錢梵衍那國錢迦畢試國錢那揭羅曷
國錢健馱邏國錢室羅伐悉氏國錢羯若鞠闍國錢鉢
邏那伽國錢波羅泥斯國錢尼波羅國錢摩揭陀國錢
伊爛拏鉢伐多國錢憍薩羅國錢摩突羅國錢乾陀越
國錢杜薄國錢康居國錢末祿國錢軒渠國錢三童國

錢阿鈞羌國錢舍衛國錢層檀國錢裸人國錢驃國錢
碎葉國錢巴氏錢俠錢賓錢沙州玉錢奇品有臺主衣
庫錢羅紋錢翅紋錢北斗錢軒轅錢柄文錢日月錢非
文錢雙五錢雙十錢星月錢四五錢八星錢鯨文錢兔
犬錢明月錢四神錢萬國錢龍文錢三雀錢龜背錢水
波紋錢雙星錢玄武錢千秋錢龍鳳重輪錢雙鳳錢雙
魚錢四事錢單面龍鳳錢龍鳳錢藕心錢神品有輕影
錢消水錢會稽船錢青溪宅錢太平錢齊興郡錢齊安

郡錢令公百爐錢廣宗郡錢偽趙錢軒轅錢孫先生錢
桐城錢白雀錢壽春錢應元錢北海鐵錢嚴君平錢科
斗錢鷺口洞錢厭勝品有永安五男錢七夕錢福慶錢
撒帳錢男錢辟兵錢千金錢豐樂錢君宜侯王錢長年
錢富錢五男二女錢天下太平錢

路史有軒轅氏金長寸七分重十二銖其文作𠂔王存
又云軒轅字合為一按古封禪文與此正同太昊氏之
棘長寸七分肩廣一寸足間六分有肉好幕作𠂔斤一

金作舌芒又寶鼎尉王博家有一布長寸六分肩廣八分首廣五分足間二分重六銖面文作川昊乃帝昊字幕文作𠂔所謂了傍斜畫蓋義字也又董令昇家有一種長寸八分額廣六分肩廣寸一分奇足間五分重十二銖面文作父昊幕文作𠂔皆太昊字也考之盟鐘帝直作二則此立之川信為帝字又封禪文昊作昊可見神農貨曰一金其為幣衆有一種長二寸六分首廣寸六分有肉好無輪郭足間正圓面文六字背文一字又

一種長二寸四分上廣寸五分下廣寸三分首廣六分足間五分重八銖無好及肉郭面七字縱橫神農幣也又有一大錢徑寸五分重七銖好圓無輪郭狀如半兩銅色純赤左有計字鈎畫甚精神字也又少吳氏貨長寸七分肩廣一寸足間六分有好面有匕舌少匕化字水少字舌金字天寶元年李幼奇得一種文作隆噶乃高陽氏金也長寸一分下廣九分首長廣各五分向上漸潤足支四分間廣三分背文如八字帝嚳貨重斤一

金長寸八分肩廣寸一分足間五分正圓重十二銖無
好郭又李涿家有黃帝貨長二寸一分肩廣寸七分枝
長六分間四分半首廣七分質厚重二十八銖其文作
串呂二斤全幕文串又二種大小輕重與此正等六字
亦同但倒書之其串作串此幣之最大者又舜策乘馬
長二寸上廣寸二分下寸三分首長廣各七分足間五
分正圓文尚全肅正尚舜背面肉好皆有周郭又葛天
氏之幣其文作𠂔尊盧氏之幣其文作𠂔又長平布中

有高陽氏金其文作𠂔以舌一及作𠂔陽俞平陽俞陽
隙凡五種有肉郭又一種其文作𠂔旨𠂔于一幕文皆
全

今人數錢百錢謂之陌者其實只是百字如什與伍耳
唐自皇甫鎛為塾錢法至昭宗末乃定八十為百漢隱
帝時五司使王章每出官錢又減三錢以七十七為百
輸官仍用八十至今輸官錢有用八十陌者唐書開元
錢重一銖四參今蜀郡亦以十參為一銖參乃古之參

字恐相傳之誤耳

太宗賜房玄齡黃銀帶顧謂玄齡曰昔如晦與公同心輔政今日所賜獨見公因潛然流涕程氏繁露以為黃銀者何物其殆鍤石也若以鍤帶而賜大臣何足貴者按禮斗威儀曰君乘金則黃銀見當是瑞物也

玉有山玄文者有水蒼文者有白如截肪者有赤如雞冠者有黑若純漆者有黃若蒸栗者以于闐國所產為最見財貨源流唐天寶中興國獻軟玉鞭屈之則首尾

相就舒之則勁直如繩武宗會昌九年夫餘國貢火玉
色赤光照數十步積之可以然鼎置之室中則不復挾
纈見杜陽編寧王有煖玉鞍見天寶遺事元載紫龍髯
拂刻紅玉以為環紐見杜陽編肅宗賜李輔國玉辟邪
二各長一尺五寸奇巧非人間所有其玉之香可聞於
數百步雖鑱於金函石匱終不能掩其氣或以衣裾誤
拂則芬馥經年縱澣濯數四亦不消歇見孔氏六帖
白樂天琵琶行楓葉荻花秋瑟瑟此句絕妙楓葉紅荻

花白映秋色碧也瑟瑟珍寶名其色碧故以瑟瑟影指
碧字讀者草草不知其解也今以問人輒答曰瑟瑟者
蕭瑟也樂天又有暮江曲云一道殘陽照水中半江瑟
瑟半江紅此瑟瑟豈蕭瑟哉正言殘陽照江半紅半碧
耳

琥珀出罽賓國藥名博物志一名江珠謂松脂淪入地
千年化茯苓茯苓千年化琥珀今泰山有茯苓而無琥
珀永昌有琥珀而無茯苓又桃潘入地所化虎目光入

地化物如琥珀後漢書哀牢夷虎魄廣雅曰虎魄生地
中其上及旁不生草深者八九尺大如斛削去皮成虎
魄如斗初時如桃膠凝堅乃成雜俎又言龍血入地為
琥珀南蠻記寧州沙中有折腰蜂岸崩則蜂出土人燒
治以為琥珀

琉璃魏略本質是石乃大秦國出赤白黑黃青綠縹紺
紅紫十種流離此蓋自然之物采澤光潤踰於衆玉其
色不恒今俗所用皆銷治石汁加以衆藥灌而為之尤

虛脆不貞實非真物也魏太祖為琉璃行殿容百人晉
滿奮坐琉璃牕內有寒色元載家有琉璃盤一尺面小
說丐者媚兒有琉璃餅唐末尚琉璃釵釧唐宰相名投
於琉璃餅中

瑪瑙品類多不同出產有南北其實一石卵爾大者如
斗其體質堅硬碾造費工若南瑪瑙產大食等國色正
紅而無瑕可作杯筆器具生西北者色青黑謂之鬼面
青赤須間以紅色如珠絲者為妙若靈夏瓜沙羗地磧

中間得之者尤奇有柏枝瑪瑙質如水玉上有枝葉儼如柏枝又有金子瑪瑙黑白相間大不過一二寸又有合子瑪瑙質理純黑中間白綠者可作數珠間隔又有夾胎瑪瑙正視之則瑩白光彩倒視之則若凝血蓋一物而有兩色也出西羌砂磧中世不多見有紫雲瑪瑙者今和州產者可作屏障卓面等用實一石爾又丹邱之野多鬼血化為丹石則瑪瑙也見拾遺記黃帝時有瑪瑙甕堯時猶存見十洲記唐開元龜茲國進瑪瑙枕

枕之十洲三島在夢中帝號游仙枕見天寶遺事武帝
會昌中渤海貢瑪瑙櫃裴行儉有瑪瑙盤見唐史

玻璃一作頗黎一作玻瓈西國寶千年水化故曰水玉
今有外國所市玻璃杯鏡乃燒成者又有五色小餅值
極高其質俱自銷冶所成非所謂水玉也恐別是一種
耳

靺鞨國名古肅慎地也其地產寶石大如巨栗色紅赤
中國謂之靺鞨文與可朱櫻歌云君王午坐鼓猗蘭翡

翠一盤紅靺鞨又葛魯卿西江月詞云靺鞨斜紅帶柳
皆用靺鞨事

晉王衍神姿高徹如瑤林玉樹唐王勃與兄勔勳皆才
美故人號之曰三珠樹如

闕

言可人坐上三珠樹

皆本諸此初不解所謂每疑以為如稱玉樹瓊枝之流
而山海經又言崑崙之墟北有珠樹文玉樹玕琪樹實
皆樹也梁吳筠詩安得崑崙山偃蹇三珠樹三珠樹始
芳絳葉凌朱虛山海經三株樹生赤水上為樹如柏葉

皆為珠聞嶺南海商下愚者言有珠子樹其珠生於蚌中蚌生於樹上綴著不解而樹乃生於石石在海底蛭戶鮫人汨於水中鑿石得樹其樹如楊柳枝良可愛也疑始釋然蓋亦珊瑚樹琅玕樹之生成者也

爾雅論貝曰大者魴小者鯖餘貶黃白文餘泉白黃文烟大而險蟻小而橢漢朱仲相貝經曰貝盈尺狀如赤電黑雲謂之紫貝素質紅黑謂之珠貝青地綠文謂之綬貝黑文黃畫謂之霞貝紫愈疾珠明目綬消氣障霞

伏蛆蟲雖不能延齡增壽其禦害一也復有下此者鷹
喙蟬脊以逐溫去水無奇功貝大者如輪文王請大秦
貝徑半尋穆王得其殼懸於昭觀秦穆公以遺燕鼂可
以明目遠察宜土宜金南海貝如珠磔白駁其性寒其
味甘止水毒浮貝使人寡無以近婦人黑白各半是也
濯貝使人善驚無以親童子黃脣點齒有赤駁是也雖
貝使病瘡黑鼻無皮是也矚貝使胎消勿以示孕婦赤
帶通脊是也慧貝使人善忘勿以近人赤幟內殼赤絡

是也。管貝使童子愚婦人淫有青脣赤鼻是也。碧貝使童子盜脊上有縷句脣是也。雨則重霽則輕。委貝使人志強夜行伏迷鬼狼豹百獸赤中圓是也。雨則輕霽則重。仲受此經於琴高曾獻珠於武帝不知所之。嚴助為會稽太守仲又出遺助徑尺之貝并致此文。

史稱窮奢極欲者前漢王氏五侯羣弟爭為奢侈。賂遺珍寶四面而至。羅鍾磬舞鄭女作倡優狗馬大治第舍起土山漸臺洞門高廊閣道連屬相望。後漢郭況起高

閣以量金玉錯雜寶以飾臺榭懸明珠四垂晝視之如
星夜望之如月梁冀大起第舍妻孫壽亦對街為宅殫
極土木互相誇競堂寢皆有陰陽奧室連房洞戶柱壁
雕鏤加以銅漆窻牖皆有綺疏青瑣圖以雲氣仙靈臺
閣周通更相臨望飛梁石磴陵跨水道金玉珠璣異方
珍怪充積私室遠致汗血名馬又廣開園囿採土築山
十里九坂以象二嶠深林絕澗有若自然奇禽馴獸飛
走其間冀壽共乘車車張羽蓋飾以金銀游觀第內多

從倡伎鳴鐘吹管酣謳竟路或連繼日夜以騁娛晉石
崇婢美艷千餘人常擇其姿容相類者數十人裝飾衣
服大小一等調四方玉什工為倒龍之珮紫金為鳳冠
之釵結紳繞楹而舞欲有召者不呼姓名悉聽珮聲視
釵色各含異香使行而笑語則口氣從風而颺又屑沈
水香末布象牀上使所愛踐之無跡者即賜珍珠百筐
初最幸為翔風後翔風退房幸綠珠珠弟子宋祿有國
色善笛後入明帝宮中齊蕭宏後庭數百千人皆極天

下之選所幸江無畏器服珍異侔於東昏潘妃寶曆直
千萬羊侃在衡州於兩艤符起三間通梁水齋飾以珠
玉加之錦繡盛設帷屏列女樂乘潮解纜觀者填溢嘗
宴北使陽斐賓客三百餘人食器皆金玉雜寶奏三部
女樂及夕侍婢百餘人俱執金花燭魚弘侍妾百餘不
勝金翠服翫車馬冠絕一時有眠牀一張皆是麝柏四
面周匝無有一異通用銀縷金花福壽兩重為脚後魏
高陽王元雍居第匹於帝宮白壁丹楹窈窕連雲僮奴

六千妓女五百隋珠照日羅衣從風時河間王琛欲敵之造文柏堂如徽音殿置玉井金罐以五色絹為繩伎女三百盡皆殊色求西域千里馬其次七百里者十餘匹皆有名字以銀為槽金為環瑣嘗會諸王陳諸寶器金甌銀甕百餘口甌擎盤盒稱是餘器有水精鉢瑪瑙琉璃盃赤玉卮數十枚工作奇妙中土所無又陳女樂及諸名馬復引諸王案行府庫錦罽珠璣冰羅霧縠充牣其內謂人曰不恨我不見石崇恨石崇不見我隋楊

素後庭伎妾曳綺羅者以千數第宅奢侈僭擬宮禁有
鮑亨者善屬文殷胄者工草隸竝沒為家奴秦王楊俊
為妃作七寶羃羅車不可載以馬負之而行又為水殿
香粉塗壁玉砌金階梁柱棖棟之間周以明鏡間以寶
珠極瑩飾之美與賓客伎女絃歌其上唐張易之為母
阿臧造七寶帳鋪象牙床織犀角氍毹襍蟲氍毹汾晉
龍犀臨河鳳翽為席宗楚客造一宅皆是文柏純帖沉
香和紅粉泥壁文石為階砌安樂公主造定昆池四十

九里累石為山以象華岳引水為澗以象天津飛閣步
檐斜橋磴道衣以錦繡畫以丹青飾以金銀瑩以珠寶
又為九曲蓮花臺泉於臺湧出窮天下之壯麗楊國忠
諸姨弟五家聯亘治錦繡琢金玉者大抵千人變化若
神仙每帝幸華清宮五家隊合炯若萬花川谷成錦繡
遺鈿墜鳥瑟瑟珠翠狼藉於道香聞數十里宅中沉香
亭禁中遠不建虹霓屏風雕刻前代美人形服玩衣服
皆衆寶雜砌水精為地外以玳瑁水犀為押絡以珍珠

瑟瑟非人力所製元載芸輝堂于闐香芸潔白如玉屑
以塗壁沈檀為梁棟金銀為戶牖中設前虹霓屏風紫
綃帳輕疎而薄風不能透冬溫夏涼有龍髯紫拂色如
爛椹削水晶為柄刻紅玉為環紐所幸薛瑤英肌體自
香處金絲帳却塵褥李昌夔在荊州打獵大修裝具其
夫人獨孤氏亦出女騎一千皆著紅繡襖錦鞍韉鳳靴
銀鐙于頔在襄州點山燈油一上二千石南宋張循王
孫張鎡宴客牡丹會既集坐一虛堂寂無所有俄問左

右云香發未答云已發命卷簾則異香自內出郁然滿坐羣伎以酒殽絲竹次第而至別有名伎數十首戴牡丹衣領皆繡如其色歌昔人所作牡丹詞進酌而退前後花與伎凡十易杯器皆如其色酒竟歌者舞者數百人列行送客燭光香霧歌吹雜作恍然若仙遊又如晉劉威碩在蜀車服侈靡艷妾數十能為聲樂悉教誦靈光殿賦謝靈運門故恒數百人室宇華曠盡山泉之美車服鮮麗衣裳器物多改舊形世共宗之宋徐湛之產

業甚厚宇舍園池貴游莫及伎樂之美冠絕一時門生
千餘皆三吳富人子姿質端美衣服鮮麗每出入行游
塗巷盈滿齊徐君舊為湘東王諮議文冠一府新聲艷
語人多諷習尤長部書問無不對善絃歌好聲色侍妾
數十皆佩金翠曳羅綺服翫悉以金銀閉門盡日酣飲
有時載伎肆意游行荆楚山川靡不游踐右弇州說部
所載當其生存為俗士所艷及其零落山丘與貧無置
錫者同作一丘土耳如梁冀石崇楊國忠張易之之流

求死牖下如匹夫猶不可得是則富侈之為禍甚烈也
書以為戒

說略卷二十六

欽定四庫全書

說略卷二十七

明 顧起元 撰

卉牋上

招搖山有祝餘狀如韭而青花食之不饑小華山有草
荔狀如烏韭而生於石上亦緣木而生食之已心痛符
禺山有草多條狀如葵而赤花黃實如嬰兒舌食之使
人不惑石脆山有草如韭而白華黑實食之已疥竹山
有黃瞿其狀如檇其葉如麻白華而赤實其狀如赭浴

之已芥又可以已附英山之陽多箭筈

筈竹也

浮山有薰

草麻葉而方莖赤華而黑實臭如薜蘿佩之已癘疔家

山有骨蓉葉如蕙本如桔梗黑華不實食之使人無子

天帝山有杜衡狀如葵臭如薜蘿可以走馬食之已癰

皚塗山有無條狀如藁荻葉如葵而赤背可以毒鼠昆

侖之丘有蕒

音頻

草狀如葵味如葱食之已勞甘棗之山

有籜葵本而杏葉黃華而夾實可以已瞢脫扈山有植

楮狀如葵葉而赤華莢實實如椶莢可以已癩食之不

昧牛首山有鬼草葉如葵而赤莖其秀如禾食之不憂
陰山多雕棠葉如榆而方實如赤菽食之已聾鼓鐙山
有榮草葉如柳本如雞卵食之已風青要山有荀草狀
如蕞而方莖黃華赤實其本如藁本服之美人色熊耳
山有葶藶亭寧二音狀如蘇而赤華可以毒魚陽華山有苦
辛其狀如櫛即楸字其實如瓜其味酸甘食之已瘧休與
山有夙條狀如著赤葉而本叢生可以為簪鼓鍾山有
焉方莖黃華圓葉而三成可以為毒姑媯音遇山有葍草

其葉膏成其華黃其實如菟丘服之媚於人苦山有無
條員葉無莖赤華不實服之不癭大菩山有牛傷葉如
榆方莖而蒼傷其根蒼文服者不厥可以禦兵半石山
有嘉榮生而秀高丈餘赤葉赤華不實服之不寢太室
中有葍草狀如茱白華黑實澤如蓂蓂服之不味少陰
山有蒿音剛草葉狀如葵而赤莖白華實如蓂蓂食之不
愚太山有梨葉狀如荻而赤華可以已疽敏山有狼狀
如著而毛青華白實服之不天可以治腹病高梁山有

草狀如葵而赤華莢實白拊可以走馬兔牀山有雞穀
其本如雞卵其味酸甘食者利於人昆侖之墟有木禾
長五尋大五圍以上見山海經釣影山有丹藿生於水
中葉浮水上紫河有寒荷霜下方香盛波弋國有神精
香草一根百條其間如竹節柔軟其皮如絲可為布堅
密如冰紈瑤琨有碧草如麥割之釀酒飲一合三旬不
醒但飲甜水隨飲而醒種火山有明莖草夜如金燈照
見鬼物之形亦名照魅草以藉足履水不沉有夢草似

蒲色紅晝縮入地夜則出懷之則夢所思之人有鳳葵
草丹葉長四寸味甘久食令人身輕肌滑有五味草初
生味甘花時味酸食之使人不眠名曰却睡草烏哀國
有龍爪薤長九尺色如玉煎之有膏和紫桂為丸服一
粒千歲不饑有掌中芥葉如松子取其子置掌中吹之
而生一吹長一尺至三尺而止然後可移於地上不經
掌中吹者不生也食之能空中孤立足不躡地亦名躡
空草有龍肝瓜長一尺花紅葉素生於水谷所謂水谷

素葉之瓜仙人瑕丘仲食之千歲不渴玄都翠水有翔
雞菱菱碧色狀如雞飛仙人鳧伯子食之骨輕身生毛
羽眺蟾臺宴有地花氣葛此葛於地下生花入地十丈
乃得此葛其根倒出以上見洞冥記祖洲有不死之草
形如菰苗長三四尺人已死三日者以草覆之皆活服
之令人長生見十洲記洹流有石蕖青色甚堅而輕一
莖百葉千年一花崑流有素蓮一房百子凌冬而茂沉
流生碧藕長千常七尺為常也條陽山出神蓬如蒿長

十丈周以為宮柱所謂蒿宮燕昭王時有千莖穊穊於空中自生花實落地則生根葉一歲百獲一莖滿車漢昭帝琳池中植分枝荷一莖四葉狀如駢蓋日照則葉低若葵之衛足名曰低光荷實如玄珠食之令人口氣常香背明國北有虹草長一丈葉如車輪根大如轂花似朝虹之色有宵明草夜視如列燭晝則無光自消滅也有日精紫菊一莖一蔓延及數畝味甘食者不饑渴有佳茅高五丈然之成灰以水灌之復成茅也謂之靈

茅有黃渠草映日如火其堅韌若金食者焚身不熱有
夢草葉如蒲莖如箸采之以占吉凶萬不遺一有聞遐
草服者耳聰香如桂莖如蘭後漢明帝燉煌獻穹窿瓜
長三尺而形屈曲味美如飴昔道士從蓬萊山得此是
崆峒靈瓜四劫一實恒山獻巨桃霜下結花隆暑方熟
晉北方有抬星麥釀酒醇美久含令人齒動若大醉不
叫笑搖蕩令人肝腸消爛魏文時有合歡草狀如著一
株百莖晝則衆條扶疎夜則合為一莖謂之神草晉浮

支國獻望舒草其色紅葉如荷近望如舒遠望如卷團
團如蓋亦曰月出則舒月沒則卷祖梁國獻蔓金苔色
如黃金投於水中光出照日置槃中照耀滿室又名夜
明苔含明國有浮筠之蘇葉青莖紫子大如珠風吹竹
葉如鍾磬之音方丈山有濡蕞葉色如紺莖色如漆細
軟可縈海人織以為席卷之不盈一手舒之則列坐方
國之賓又有莎蘿草細如髮一莖百尋柔軟香滑羣仙
以為龍骨之饕瀛洲有芸苗狀如菖蒲食葉則醉餌根

則醒不周之粟高三丈粒皎如玉食之厯月不饑員嶠
山有芸蓬色白如雪一枝二丈夜視有白光可以為杖
岱輿山有莽煌葉員如荷去之十步炙人衣則焦刈之
為席方冬彌溫有遙香草花如丹光耀八月花葉俱香
扇馥數里子如薏實食之累月不饑玉梁有紫苔味甘
而柔滑食者千歲不饑有七色芝其色青光輝耀謂之
蒼芝以上見拾遺記酒杯藤出西域藤大如臂葉似葛
花實如梧桐實大如指香如荳蔻可以醒酒見李石續

博物志海南有睡草見之則令人睡一名睡草見述異
記良常山有螢火芝葉似草實大如豆紫花夜視有光
食一枚心中一孔明食至七七竅洞徹可以夜書句曲
山有夜光芝一株九實實墜地如七寸鏡夜視如牛目
雅州有舞草人對之歌及抵掌謳曲必動葉如舞常山
北有護門草寘諸門上夜有人過輒叱之南海有睡蓮
夜則花低入水北天竺國出蜜草秋冬不彫因重霜露
遂成蜜如塞上蓬鹽南方有地日草三足烏欲下食此

草則美悶不復動以上見酉陽雜俎木蘭皮國所產麥一粒長三寸瓜圍四五尺榴一顆重五斤桃二斤見異域志

招搖山有迷穀狀如穀而黑理其花四照佩之不迷侖者山有白荅如穀赤理汗如漆味如飴食者不饑可以釋勞可以血玉符禺山有文莖其實如棗可以已聾英山上多杻樗浮山多朐木枳葉而無傷木虫居之崇吾山有木員葉白柎赤華黑理實如枳食之宜子不周山

有果實如桃葉如棗黃華赤柎食之不勞音密山多丹

木員葉赤莖黃華赤實味如飴食之不饑昆侖之邱有
河棠黃華赤實其味如李而無核可以禦水食之使人
不溺中曲山有櫟木狀如棠而員葉赤實實大如木瓜
食之多力崦嵫山多丹木葉如穀實大如瓜赤符黑理
食之已痺可以禦火北號有木狀如楊赤華其實如棗
而無核其味酸甘食之不瘧東始山有芭木狀如楊而
赤理其汁如血可以服馬厯兒山有櫟木方莖員葉黃

華而毛其實如棟服之不忘菰山有芒草狀如棠而赤
葉可以毒魚柄山有菱狀如檣葉如桐而莢實可以毒
魚苦山有黃棘黃華員葉其實如蘭服之不字堵山有
天_音徧鞭方莖而葵狀服者不噎放皋山有蒙木葉如槐

黃華而不實服之不惑少室山有帝休狀如楊其枝五

衢黃華黑實服者不怒太室山有栢音木狀如梨而赤

理服者不妬講山有帝屋葉狀如椒反傷刺下赤實可

以禦山浮戲山有亢木葉狀如檣而赤實食之不蠱敏

山有荊柏狀如荆白白華赤實服者不寒宣山有帝女之桑大五十尺其枝四衢葉大尺餘赤理黃華青柎豐山多羊桃狀如桃而方莖可以為皮張

治皮腫起

弱水有建

木狀如牛引之有皮若纓黃蛇其葉如羅其實如藥其木若蔭開明北有珠樹文玉樹玕琪樹有聖木食之令人智聖洞野山有若木赤柎青葉赤光下照地九丘有建木青葉紫莖玄華黃實百仞無枝有九櫨下有九枸其實如麻其葉如芒以上見山海經東方荒外有豫章

其高千丈圍百丈本上三百丈始有條枝數張如帳荒
外大山生不晝之木晝夜火然得暴風不猛猛雨不滅
南方有樹名椶櫚三千歲作花九千歲作實葉長七
尺廣四尺實長九尺圍如長無瓢核竹刀割之如酥有
如何三百歲作花九百歲作實實有核金刀割之則酸
蘆刀剖之則辛食之者神仙不畏水火白刃東方有樹
高百丈名梨子徑三尺剖之少瓢白如素和羹食之地
仙衣服不敗辟穀可入水火南方有耶木高三千丈子

形如甘瓜少親

音練

甘美食之令人身澤不可過三升令

人冥醉半日乃醒東方有桃子徑三尺食之令人壽短
北方有棗子長六七寸圍過其長熟赤如朱乾之不縮
食之安軀益氣力南荒有涕竹長數百丈圍三丈五六
尺厚八九寸可以為船其筍甘美食之可以止創癰南
方有邯鄲高百丈圍三尺八寸促節多汁甜如蜜咋其
汁可以節虺滄浪洲生強木木方一寸可載百許斤東
北荒有栗實徑三尺二寸殼赤肉黃白味甜食之令人

短氣而渴崑崙山上有柰冬生子碧色須玉井水洗之
方可食以上見神異經漢武靈壽壇上植垂龍之木木
高十丈有朱露洒其葉如珠枝如龍之倒垂崑崙山有
細棗萬年一實如今之軟棗咋之有膏膏可然燈外國
有青檀木膏如淳漆削置器中以蠟和之塗布然照數
里塗山之背梨大如升或云斗紫色千年一花亦曰紫
輕梨琳國有玉葉李色如碧玉數十年一熟韓終常餌
此李因名韓終李西那汗國有聲風木實如油麻風吹

枝如玉聲此木五千年一汗萬歲不枯有指星之木以
木指彗星星尋則沒有紫柰大如斗甜如蜜核紫花青
有汁如漆可染衣亦名閭衣柰胥池寒國有發日樹日
從雲出雲來掩日風吹樹枝拂雲開日光也影娥池有
生金樹破之皮間有屑如金而色青亦名青金樹以上
見洞冥記聚窟洲有返魂樹花葉香聞數百里伐其根
心於玉釜中煮汁焚之聞香死者在地皆却活不復亡
也東海有扶桑長數千丈大二千餘圍樹兩兩同根偶

生更相依倚九千歲一生堪食之體皆作金光色以上
見十洲記西海有窮桑直上千尋葉紅堪紫萬歲一實
食之後天而老閭河之北有紫桂其實如棗羣仙餌焉
陰岐有黑棗其樹百尋實長二尺核細而柔百年一熟
崂塘山有桃樹百圍其花青黑萬歲一實晉思烟臺有
仁壽木似柏而枝長柔軟其花可食祈淪國有壽木一
樹千尋日月為之隱蔽若經憇此木下皆不死不病頻
斯國有大楓樹高六七十里善算者以里計之雷電常

出樹身之半方丈山有恒春樹葉如蓮花芬芳如桂花
隨四時之色一名沉生瀛洲有影木日中視之如列星
萬歲一實實如瓜青皮黑瓢食之骨輕以上見拾遺記
黃金山有交讓木楠也一年東邊榮西邊枯一年西邊
榮東邊枯年年如此大食國有小兒樹榦赤葉青枝上
總生小兒長六七寸見人皆笑動其手足頭著樹枝使
摘一枝小兒便死北方有七尺之棗南方有三尺之梨
人不得見或見而食之即為地仙以上見述異記

自太史公謂司馬長卿所載草木鳥獸多過其實後人相沿疑之以盧橘夏熟答運雜支等語皆為增飾按西京雜記載梨有大谷細葉縹蒂金葉瀚海東王紫條青玉梨芳梨九種棗有弱枝玉門青華赤心西王棠棗樓東七種栗有候榛瑰嶧陽四種桃有湘核金城綺葉紫文秦桃桴桃霜桃胡桃櫻桃含桃十種李有青綺青芳同心車下含枝金枝顏淵紫李綠李朱李黃李羌李燕李蠻李侯李十五種柰有白紫綠三種櫨有蠻羌猴三

種梀有青烏赤葉三種棠有赤白青沙四種梅有紫葉
紫萼同心麗枝朱梅燕梅猴梅七種杏有蓬萊文杏二
種桐有椅桐梧桐荆桐三種林檎十枇杷十橙十安石
榴十檉十白銀樹十黃銀樹十槐六百十千年長生樹
十萬年長生樹十扶老木十守宮槐十金明樹二十搖
風樹十鳴風樹十琉璃樹七池離樹十離婁樹十白榆
栒桂蜀漆樹各十栲四樅七栝十楔四楓四後云從上
林令虞淵得羣臣所上草木名二千餘種後失其本此

其記憶者又茂陵富人袁廣漢園有白鸚鵡紫鴛鴦牦
牛青兕奇獸怪禽江鷗海鶴悉沒入上林太液池中有
鳴鶴舟容與舟清曠舟採菱舟越女舟池有洲黏樹一
株大六十圍五柞宮五柞樹蔭覆數十畝三輔黃圖高
帝時南粵王獻龍眼樹武帝於交趾移荔枝百株植上
林建扶荔宮中有菖蒲百本山薑十本甘蕉十二本留
求子十本桂百本蜜香指甲花百本龍眼檳榔橄欖千
歲子甘橘皆百餘本內荔枝一株獨茂忽一夕萎死守

吏死者百餘夫草木多至二千餘種則長卿所言固未虛也

緬素雜記云秦始皇上泰山立石封祠下風雨暴至休於樹下遂封其樹為五大夫五大夫者秦官名第九爵也唐陸贄作禁中春松詩云不羨五株樹李商隱有五松驛詩李白序謂風雨暴作五松受職皆言五松事按應劭云秦皇逢暴雨得五松因封為五大夫蓋當時大夫係封五株松非一松也是以庾信終南山詩曰水奠

三川后山封五樹松觀此則知誤用不始於唐人矣

揚子雲甘泉賦玉樹青蔥師古注玉樹武帝所作集衆
寶為之向注文選亦謂武帝植玉樹於此宮以碧玉為
葉按三輔黃圖云甘泉宮者有槐樹今謂玉樹根榦盤
峙三二百年木也楊震關輔古語記曰耆老相傳咸以
謂此樹即揚雄甘泉賦玉樹青蔥者也又觀隋唐嘉話
國史纂異長安記聞見錄等雜書皆言漢宮以槐為玉
樹因知晉人所謂芝蘭玉樹者蓋指此也又考漢武故

事上起甲帳乙帳前庭種玉樹珊瑚為枝碧玉為葉自
在神宮中只非甘泉宮事知師古與向之注為甚謬而
左思之見未審也古來文士如曹操曹植王粲摯虞庾
儵傅選庾信之徒皆有槐賦其述種於宮殿之間美致
曲盡獨未有以玉樹為言者何耶紀少瑜詩玉樹起千
尋曹植詩絲蘿綠玉樹得非即此乎後漢劉梁七舉亦
曰玉樹青蔥

檇杌舊注惡獸名非也檇斲木也一作剛木注引楚謂

之檮杌惡木也取其記惡以為戒趙岐曰檮杌者器凶之類興於記惡之名杌樹無枝也从木从壽从兀壽久也兀不動也不从才則非獸明矣史高陽才子檮戲漢書檮余山秬文志檮生皆作直由切惟孟子今音濤陸德明九經釋音誤之也

吳都賦平仲君遷注皆木名劉成曰平仲之木實白如銀君遷之樹子如瓠形而未詳也平本作枰上林賦華楓枰櫨其木理平可為碁局故棋盤曰枰唐詩芳春平

仲綠清夜子規啼是也君遷本作楮櫪出交趾司馬溫公云如馬姝俗名牛姝栳今本草有君遷子味甘平無毒止渴去煩熱令人潤澤樹高丈餘子中有汁如乳汁生海南又言即栳漆非也別有栳栳日華子云作漆甚妙生江淮南似栳而青黑色閒居賦梁侯烏栳之栳是也

世說蒲柳之質望秋先零蒲水楊也三齊地記無棣縣有秦王繫馬蒲堪為箭非菖蒲之蒲也若然豈堪繫馬

又中為箭乎爾雅楊蒲柳其言可證矣

娑羅樹出西番海中每枝生葉七片有花穗甚長而黃
如栗花秋後結實如栗可食正所謂七葉樹也唐李邕
娑羅樹碑云惡禽不集凡草不庇東瘁則青郊苦而歲
不稔西茂則白藏泰而秋有成是也第以段成式之博
雅而曰花開如蓮則大悖耳其樹詳於佛書維摩詰經
有菴羅樹唐會要云菩提樹一名皮羅樹葉似白楊即
思惟樹一名成道樹西域記名卑鉢羅又雙樹名婆羅

樹其花名婆羅法今所稱婆羅法門也蓋婆娑音同故互言之耳

竹之類甚多如箭竹會稽竹箭見爾雅桃枝竹皮滑而黃可以為席見戴凱之竹譜篁竹似桂而概節筍竹一名篋竹出日南九真可為矛並見竹譜節竹出身毒國可為杖一名狹竹見漢書種龍竹任作笛雲母竹攤竹並見廣志蕙簦竹皮薄而空皮上有澁可為錯見嶺表錄異狗竹有毛出臨海簚竹一名蔽竹葉大如扇可以

衣蓬並見竹譜由梧竹堪為屋梁柱見林邑記斑竹湘
水見博物志篋簞竹一名箬竹出建安始興見吳錄異
苑苦竹張廌種見永嘉郡記射竹為箭見竹譜沙麻竹
一名蘇麻竹可為弓見南極志石麻竹勁利可為刀見
裴淵廣州記苞竹平鄉堪作布見顧微廣州記雞頸竹
筍有青斑色綠蘆蔥竹筍竹大如脚指虫食其筍皮如
繡可愛並見竹譜莽竹疏節刺竹堅中蘭竹中空仲竹
無筍並見爾雅筍竹君乘水而王具政太平筍紫脫為

常生見禮斗威儀漢竹永昌圍三尺餘利竹並見廣志
林筴竹竹薄而廣見竹譜晉竹吳王賜越王晉竹十瘦
見吳越春秋棘竹一名芭竹一名刺勒生交州菴竹南
越之居梁柱是供弓竹東垂諸山並見竹譜蕩竹篠蕩
見禹貢孝竹一名慈竹孤竹東海中為管並見述異記
方竹葛仙於定海靈峯植見寧波志實心竹雲南出文
彩斑駁可為器物見雲南記文竹高平山生見湘州記
筋竹陽嶼仙山見永嘉記筆竹宜為絲織器猫竹大竹

也江南諸山出見雜記怪竹荊州唐高宗遣宦者取之
見唐書

詩瞻彼淇澳綠竹猗猗毛注云澳隈也策王芻也竹篇
竹也又陸璣云淇澳二水名策竹一草名其莖葉似竹
青綠色高數尺詞賦皆引猗猗入竹事誤也按傳曰淇
衛筍路又曰淇衛之箭又下淇園之竹以為楫又伐淇
園之竹以為矢是淇之產竹自古而然詩曰綠竹猗猗
言竹之初生其色綠也長則綠轉而青矣故曰綠竹青

青卒章又曰如簦如簦言其盛也故謝莊竹贊亦曰瞻彼中堂綠竹猗猗毛陸之說未可從也

杜子美有從韋明府續處覓錦竹兩三叢詩黃鶴注云考竹譜竹紀無錦竹意以其文如錦名之竹紀有蒸竹箇墮竹其皮類繡豈即此乎劉會孟批杜錦樹行云題曰錦樹使人刮目錦竹亦新惜無拈出者耳梅宛陵集錦竹詩曰雖作湘竹紋還非楚筠質化龍徒有期待鳳曾無實本與凡草俱偶親君子室又注其下云此草也

似竹而斑始知黃鶴今註之昏耳

李旼該聞集云舊稱竹實為鸞鳳所食今近道竹間時見花開如棗結實如麥江淮號為竹米以為荒年之兆其竹即死信非鸞鳳之實也近有餘干人來言彼有竹實大如雞子竹葉層層包裹味甘勝蜜食之令人心肺清涼生深竹林茂密處頃因得之淮日久枯乾而味尚存乃知鸞鳳所食必非常物也

棗之名壺棗細要棗白棗酸棗羊棗大棗苦棗無實棗

還味棗見爾雅玉文棗見關令尹傳宜海棗見女生別傳紫棗穀城出墟棗一名安益棗夏后棗梁國夫人棗單父棗三星棗駢白棗灌棗狗牙棗雞心棗牛頭棗獼猴棗玄棗崎廉棗桂棗夕棗見廣志西王母棗羊角棗見鄴中記握核棗見洞冥記仙人棗見洛陽伽藍記仲思棗信都獻見杜實大業拾遺記波斯棗見嶺表錄異紫紋棗金槌棗鳳眼棗隋煬帝西苑見事林廣記樂氏棗青州見齊民要術海棗大如杯益見南方草木狀碧

棗滄洲見杜陽編龍骨棗河中府貢見地理志水菱棗
見圖經千年棗大食國有見杜還經行記

桃之名旄冬桃杼桃山桃見爾雅金桃銀桃康國獻見
唐書玉桃見神農經度皮桃見漢舊儀碧桃見關令尹
傳白桃猴桃見晉中興記勾臯桃見鄴中記寒桃見南
康記冬桃夏桃秋桃見廣志木桃見述異記偏核桃占
畢國見北戶錄臯桃在樹不落見本草經石桃見南康
記餅桃迎冬桃見事林廣記

杏之名紫杏見南嶽夫人傳海杏見郭太機果賦范蠡
宅中有赤杏見王廙洛都賦金杏見齊南郡志縹杏瀨
鄉老子祠見述異記

李之名趙李麥李駁赤李見爾雅木李見毛詩玉李見
抱朴子鍾山李見漢武內傳圓丘紅李同上春李見鄴
中記細李見周處風土記玄雲李見真人王褒內傳紫
李青綺李青房李黃李綠李顏淵李見曾志車上李鼠
李黃建李馬肝李房林李榛李擘李杏李孝李夏李冬

李見廣志白李見列異傳縹李見陸機果賦緗李見王
廡洛都賦玉文李見黃帝內傳金李安陽李見述異記
黃中李西王母珍之見集真記嘉慶李東都嘉慶坊出
又崔奉國家李肉厚無核曰天罰畢龍割其耳血墮地
生此李見琴莊美事又王侍中家堂前有鼠穴生李樹
花實俱美此鼠精李也見好事錄

梨之名赤梨扶桑國見齊書酢梨太山見漢官儀哀家
梨秣陵見世說紫梨王母食見關令尹傳玄光梨見漢

武內傳金柯梨出琅邪王野家含消梨見辛氏三秦記
官梨見永嘉記蕭梨見宋五行志黃梨恒陽見傅選賦
昫山梨見左思齊郡賦玉乳梨煬帝西苑見廣記鳳棲
梨河中府貢見地理志紫花梨唐武宗真定縣產見耳
目記同心梨呂光時燉煌太守宋歆獻見段龜龍涼州
記

柑橘之名建春柑見神異經天寶柑天寶宮中植見雜
俎壺柑見古今注合歡柑見明皇遺事羅浮柑見國史

補宜都柑見荊州記平蒂柑見廣志胡柑見風土記海
紅柑洞庭柑朱柑黃柑枝柑乳柑又黃橘塌橘包橘綿
橘沙橘荔枝橘油橘綠橘乳橘東橘金橘自然橘早黃橘
軟條穿橘並見事林廣記

栗之名猴栗唐李德裕出此宴客見酉陽雜俎朔濱栗
見王逸賦云北燕薦朔濱之巨栗陽胡栗蔡中郎言見
齊民要術華林栗晉華林園植南安栗見王褒僮約吳
栗升十五枚漢武時生見三秦記漸栗虔州南形如棗

核見酉陽雜俎三栝栗隋時蔡州進紫皮栗巨栗漁陽
栗見事林廣記倭韓國上栗大如雞子桂陽栗大如柿
見詩義疏中山好栗見何宴九州論及盧毓冀州論天
台栗王可交遇仙與二栗青赤光如棗長二寸許見續
神仙傳

南果之佳者曰百韻勝曰勝番糖曰菩提果曰金甘子
曰蜜出律曰勝花曰小剝曰芋曰黃彈子曰山棗曰荻
蔗曰牛妳柿北果之佳者曰鸚哥舌曰醉楊妃曰宜母

子曰嘉慶子曰波羅蜜曰銀桃曰金杏曰桔子仁曰巴
攪子夷果之佳者曰胡榛子阿月子並出西國侯騷子
蠻藤子出南詔瞻波果出瞻波國底爾實出阿哩國綺
縞實出大荒似東瓜相嫁實出南荒范成大桂海虞衡
志載南果五十五種其常見者不載它如曰綿李曰石
栗曰龍荔曰木竹子曰冬桃曰羅望子曰人面子曰烏
攪曰方攪曰蕉子曰雞蕉子曰茅蕉子曰紅鹽草菓曰
鸚鵡舌曰八角茴香曰餘甘子曰五梭子曰黎朦子曰

波羅蜜曰柚子曰櫓罟子曰槎擦子曰地蠶曰赤柚子
曰火炭子曰山韶子曰山龍眼曰邵諦子曰木賴子曰
粘子曰羅晃子曰千歲子曰赤棗子曰藤韶子曰古米
子曰穀子曰藤核子曰木連子曰羅蒙子曰毛栗曰特
乃子曰不納子曰羊矢子曰日頭子曰秋風子曰黃皮
子曰朱圓子曰匾桃曰粉骨子曰塔骨子曰布衲子曰
黃肚子

廣志云荔支樹高五六丈似桂樹深葉蓬蓬冬夏榮茂青

華朱實大如雞子核黃黑似熟蓮子肉白如肪甘而多汁
似安石榴有酸甜者至日將中翕然俱赤則可食也一樹
下子百斛王逸荔枝賦云修幹紛錯綠葉臻臻灼灼若朝
霞之映日離離若繁星之著天皮似丹罽膚若明璫潤侔
和璧奇喻五黃仰歎麗表俯嘗嘉味口含甘液心受芳氣
白居易荔枝圖序云樹形團團如帷蓋葉如冬青華如橘
春華實如丹夏熟朶如蒲萄核如枇杷殼如紅繒膜如紫
綃瓤內潔白如水雪漿液甘酸如醴酪大略如彼其實過

之張九齡荔支賦云膚玉英而含津色江萍以吐日朱苞剖
明璫出未玉齒而殆銷雖瓊漿而可軼彼衆味而有五此
甘滋之不一若乃華軒洞開嘉賓四會時當燠煜客或煩
憤而斯果在焉莫不心侈而體泰信琬盤之仙液實玳筵
之綺績有終食而累百愈益氣而理內蔡君謨荔支譜云
興化軍荔支大重陳紫其樹晚熟其實廣上而圓下大可
徑寸有五分香氣清遠色澤鮮紫殼薄而平瓢厚而瑩膜
如桃花紅核如丁香母剥之凝如水精食之消如絳雪其

味之至不可得而狀也漢武帝破南越建扶荔宮扶荔者以荔支得名自交趾移植百株於庭無一生者連年移植不息後數歲偶一株稍茂然終無華實帝亦珍惜之一旦忽萎死守吏坐誅死者數十遂不復茂其實則歲貢焉司馬相如賦上林云逕答離支正述當時所見蔡君謨以為夸言無有蓋不考也東漢時南海獻龍眼荔支十里一置五里一候奔騰阻險死者繼路臨武長唐羌上書陳狀和帝始詔太官省之唐天寶中楊妃嗜

荔支歲命涪州驛致七日七夜至京師人馬多斃於路
百姓苦之然皆漢武始之也白居易云荔支離本枝一
日而色變二日而香變三日而味變四日外色香味
盡去矣負暄雜錄云宣和殿前有荔支四株結實甚夥
不知何以能爾杜陽編云羅浮先生軒轅集上因語京
師無苴蔻花及荔支俄傾二花皆連枝葉凡數百鮮明
芳潔如新嘉靖中寶應朱曰藩家樹牌坊空中飛鳥忽
呵墮鮮帶葉荔支一枝於地一時以為奇事此必自閩

廣越海而來者因錄關中胡侍所紀荔支事并續之以
廣異聞

盧橘夏熟註既誤楊用修據吳錄地里志云朱光祿為
建安郡中庭有橘冬月覆上樹畏之至明年春夏色變
青黑味尤絕美謂此即盧橘然非上林所種也按魏王
花木志曰盧橘蜀土有給客橙似橘而非若柚而香冬
夏華實相繼或如彈丸或如拳通歲食之亦名盧橘蜀
土移栽上林固易耳

東坡橄欖詩曰待得微甘回齒頰已輸崖蜜十分甜冷
齋夜話謂事見鬼谷子崖蜜櫻桃也漫叟漁隱諸公引
本草石崖間蠶蜜為據按坡詩為橄欖而作疑以櫻桃
對言魏文帝詔曰南方有龍眼荔枝不比西園葡萄石
蜜此以諸果對言固知非石蜜也

酉陽雜俎云偏桃出波斯國波斯呼為婆淡樹長五六
丈圍四五尺似桃而濶大三月開花白色花落結實狀
如桃子而形偏故名偏桃其肉苦澁不可噉核中仁甘

甜西域諸國並珍之胡侍野談云關中有一種桃正如
雜俎所說俗謂之巴旦桃其仁極甘美遠勝巴旦杏仁
恐即偏桃也

列子吳越之國有木焉其名曰櫟碧樹而冬生櫟與柚
同漢書橘柚芬芳注曰柚即橙也非是蓋柚與橙異種
初非一物所云似橘而大味酢皮厚者是也後又云盧
橘夏熟黃甘橙榛郭璞曰黃甘橘熟而味精榛亦橘之
類張揖曰榛小橘也出武林則知柚非橙矣

葡萄漢書作蒲陶一名馬乳號草龍珠帳有紫水晶瑣瑣三種又有蓂蓂名山葡萄野生實小亦可為酒莖主嘔逆即今悠悠藤之類故名千歲藥又名為萬歲藤大者如盃冬夏不凋在草木之間詩食鬱及蓂是也

廣右甘蔗色白而甚細其堅如竹名石蜜通志赤者崑崙蔗白者竹蔗黃者蠟蔗小而燥者荻蔗又芳蔗杜蔗舊言草之蔗出者以節節側生也傳異七誨云南中茶子西極石蜜楞嚴經黑石蜜乃甘蔗糖也

易曰聖人幽贊於神明而生蓍史記曰蓍千歲則一本
百莖其下必有神龜守之白虎通曰蓍之言耆也陽之
老也故曰下有神龜上有稠蓍其形長丈其叢生滿百
莖通志蓍如蒿華如菊生上蔡白龜祠傍一叢之幹二
三十或四五十高五六尺又陳州伏羲陵上生者其葉
類細蓬蒿夫蓍乃草之最壽者六十曰耆故字从艸从
耆張茂先曰以老故知吉凶生千歲三百莖同本其上
常有黃雲覆之王充曰蓍生七十歲生一莖神靈之物

故生遲留歷歲長久劉向云龜千歲而靈著百年而一本生百莖著策傳曰天下和平王道得而著莖長丈餘其叢生滿百莖可以當大衍之數者二下有神龜守之上有雲氣覆之學齋帖碑又云一叢必四十九莖以應大衍之數恐未必然也

王者之德及草木則有萑脯一名倚扇狀如蓬大枝葉小根根如絲轉而成風殺蠅堯時生於厨有屈軼佞人入則指之有芝草令人度世有巨芘三畝之禾一稔二

米王者宗廟修則出也有華平其枝正平王者有德則
生德剛則仰德弱則俯有平露如蓋以察四方之政其
國不平則隨方而傾有朱草有聖人之德則生有芝英
王者親近耆老養有道則生有木連理有賓連有濶達
有嘉禾有嘉瓜有嘉麥有花並蒂有嘉粟有嘉黍

五芝有石芝有木芝有草芝有肉芝有菌芝石芝赤者
如珊瑚白者如肪黑者如漆青如翠羽黃如紫金皆光
明洞徹晦夜能照又有玉脂芝七明芝九光芝石芝有

石蜜芝石桂芝石硫黃芝木芝有威喜芝飛節芝樊桃
芝參成芝木渠芝建木芝木華芝黃蘗擅桓芝草芝有
獨搖芝

無風自動

牛角芝龍仙芝麻母芝白符芝隱晨芝朱

草芝五德芝龍銜芝肉芝則萬歲蟾蜍千歲蝙蝠千歲
靈龜風生獸千歲鷲之類菌芝狀如宮室或車馬或龍
虎或人形或飛鳥五色無常已上五芝服之皆令人長
生茅君句曲山有五種龍仙參成燕胎夜光玉芝霍山
有五香芝良常山有螢火芝神山有黃龍芝此外有人

芝月芝山芝火芝鳳腦芝金蘭芝隱晨芝紫朱芝朱草
芝赤雲芝月精芝黑芝金芝萬年芝夜光芝白雲芝雲
母芝華芝鬼芝然則大觀政和間王欽若丁謂蔡京輩
所進皆鬼目之類耳



說略卷二十七